

四  
行  
集  
仁  
錄

丁  
亥  
秋  
陳  
琳



五



皇明四朝成仁錄卷九

屈大均原著

葉恭綽校訂

海寧起義傳

海寧起義曰查美繼曰俞元良

查美繼字仲含海寧人為邑諸生恂恂恭謹若不能言者  
聞國變義氣奮發散家貲巨萬起兵海寧以為魯監國聲  
援謁見監國授兵部職方司主事歸引兵與敵將孟某戰  
於海鹽通園敵不利欲退我師發巨礮擊之風反舟焚美  
繼死焉

俞元良字某亦海寧人崇禎六年進士海寧起義與美繼

同事城破自經死曰我勿負美繼相要也美繼者其高大  
父秉彝以戶科給事疏參嚴嵩父子廷杖幾死謫雲南定  
遠典史嵩敗起官至府尹者也

寧波起義傳

寧波起義曰馮元京曰馮京第

馮元京字躋仲慈谿人隆武初以貢生上書行在授監察御史奉命還浙募兵元京乃入餘姚山中與王完勲起義將以應水師肅虜侯黃斌卿富平侯張侯服兵部尚書張煌言謀攻寧波事弗克遂渡江而西再起兵戰敵於青山和平頗有斬獲敵援大至元京退保四明山中被執不屈腰斬死子亦殉焉

馮京第字某寧波人為名諸生魯國主授兵部郎中改御史嘗奉命同黃斌卿之弟孝卿往日本乞師時西洋教人與日本構難講解始退退一日而京第至方戒嚴於外國

以故不聽京第等登陸京第於舟中朝服拜哭不已會其  
國遣官行部至京第因致其血書然卒不得請而還在延  
平王軍中久後入四明山中起兵與虜戰被執不屈死

金華死事傳

金華死事曰朱大典

朱大典字延之號未孩金華人萬曆四十四年進士累官  
至兵部尚書敵兵至金華大典以大學士督師固守傾家  
召募敵攻之月餘不下以持久內潰敵以紅夷大礮破之  
大典闔門縱火焚死其子師武進人鄭邠亦死

邠陳本作汾





衢州死事死節傳

衢州死事曰張鵬翼曰張鵬飛曰張繼榮死節曰胥自

修

張鵬翼字羽宸諸暨人以祖某軍功世襲某君弘光朝為  
總兵官掛淮海將軍印鎮守營湖射陽等處為中軍都督  
府右都督上北狩鵬翼罷兵以歸會紹興義師大起鵬翼  
破家貲糾率壯健斬敵將自守監國駁紹興率師入援蒙  
慰勞特甚晉太子少師鵬翼感激知遇頗以中興為己任  
身先士卒每戰多所斬獲以功封永豐伯鎮守衢州衢州  
浙閩要地以鵬翼老成宿將故委之重任焉紹興兵敗諸  
軍以次潰散鵬翼拒守尚堅標下副將秦應科等內應秦陳

本作城陷楚王樂安王晉平王皆被殺鵬翼與弟鵬飛繼

榮被執大罵至斷舌聲猶不絕同日鸞死鵬飛字耀字武  
舉人歷官永豐藩前鋒左軍都督府左都督繼榮字君實  
世襲歷官永豐藩掛鎮威將軍印右軍都督府右都督兄  
弟皆伯爵時督學御史王景亮亦不屈被殺

胥自修字二如江寧縣人萬曆四十年舉人後登進士初

知曲陽縣

陽陳本  
作江

有德政為三輔最丁艱歸補宜黃以不

能逢迎與上官忤降秩衢州府簡較陞光祿監事尚未離  
衢會國變聞自修具冠服北面再拜自是絕粒子弟微勸  
之不顧曰吾無他能惟一死以報朝廷耳城破不屈被刺  
死

浦城死事傳

浦城死事曰鄭為虹曰黃大鵬

鄭為虹字天玉未詳何許人

原注云一云揚州人按張本  
作揚州人無未詳何許人五

字明史本傳  
作江都人

崇禎十六年進士隆武二年秋以巡按御史

與給事中黃大鵬駐建寧府敵至閉城發倉米庫銀犒軍  
歡呼而去一郡以全八月十七日敵至浦城百姓哭請出  
降為虹不可請其出走亦不可未幾敵大至擁見貝勒不  
跪貝勒嘉之不忍殺勸之薙髮為虹曰貝國不忠辱先不  
孝忠孝俱虧雖生何用寧求速飲白刃髮不可斷也明日  
復邀之責以輸餉為虹曰吾清白吏安所得金百姓爭欲  
代輸之為虹又不可噴血大罵貝勒令斬之為虹大呼奮

躍奪刀自刺胸不死遂見殺大鵬同日死之都督洪祖烈  
遊擊張萬明萬明子翹鸞為虹僕陳龍皆從死百姓為之  
祠焉

黃大鵬字文若

鄆崇建陽縣志作字南溪

建陽人崇禎十三年進士知

縣義烏有政聲擢工科給事中尋轉兵科左給事中

明史本傳

無左

所條奏皆軍國大計侃侃不阿賦性孤介與同官少

所諧合尤以干謁為恥吏部門不投一刺權貴嫉之會有  
旨以閩人在任者出巡各關大鵬得請崇安去方在浦城  
敵至不屈與其子痛罵死之

天興死節傳

天興死節曰曹學佺曰傅雲龍曰胡上琛

曹學佺字能始別號石倉侯官人萬曆二十三年進士十二

三東南紀事卷四作三十二

授戶部主事天啓元年分較南闈以文體

被彈對級調用補南京大理評事陞戶部郎中出為四川

參政轉按察使大計降調補廣西副使又以文字忤魏忠

賢罷歸崇禎初兩奉詔起用堅辭予告隆武之初上念先

朝耆舊首召用之補太僕寺卿晉太常抗疏直言無所隱

晉禮部尚書兼攝大司成南宮主冊立大禮兼翰林院大

學士掌蘭臺館事奉詔修天啓崇禎兩朝國史加太子少

保少保明史本傳作太保

駕出親征以監國御弟為託天興既陷學

佺走鼓山削髮為僧時有倡義者復請學佺為主學佺尋

自經佛前年七十有三

三明文本  
傳作四

學佺嘗築石倉園藏書

先是天啓六年九月學佺為廣西副使有野史紀略一書  
議論與要典相反上命削籍毀板他所著有五經註解精  
於讖緯諸子百家俱有采輯有廿一史重編十二代詩選  
天下名勝志所刊書克棟動至數千卷人稱為藝林淵藪  
喜施予為德於鄉嘗造洪山萬安潘渡三橋梁凡梓里有  
旱潦飢饉必捐貲賑濟親友不能葬者皆為卜地有假貸  
者不取償以故舉喪之日吊者數千人哭聲震天隆武二  
年九月十八日也時通政使馬思理亦死之

傅雲龍字某別號惕菴金谿人崇禎七年進士授中書十


四年改工部都水司主事進郎中出為副使分巡興泉道  
尋進按察使加太僕寺少卿仍留任興泉故鄭芝龍門第  
藉勢以虐民者多不可問雲龍下車槩裁以法芝龍以是  
憾之天興陷隱潛於山中尋為敵帥所得聞其賢以馬來  
之入見不屈帥佯為縱釋而使健兒追殺之

胡上琛字席公

原注云一作建公

世襲福州衛指揮隆武二年天

興陷城守諸軍皆散上琛送其母入山徐與一妾飲藥而  
死





泉州死節傳

泉州死節曰蔣德璟

蔣德璟字八公鄒崇明史本傳作字中葆南疆逸泉州人

隆武初起德璟為大學士力辭行人以死請之乃至陞見

時首以清屯練軍為言尋與平虜侯鄭芝龍不合當是時

朝廷倚芝龍為重而芝龍桀驁至與閣臣抗禮出入呼殿

聲呼鄒本擬於警蹕視主上蔑如也視鄒本絲是君臣相

與猜恨相與鄒本上又殺其所善者陳謙芝龍益憤不平

遂有叛志自以兵不出關無以服物議乃分兵為二二鄒本作

三聲言萬人實不滿千而鄭鴻逵為大元帥出浙東鄭彩

為副元帥出江西上築壇郊外拜而送之既及關侯餉屯

皇明四朝成仁錄 卷九 三二〇 廣東叢書

駭不行上敦催再三乃不得已踰關行四五百里輒還

鄔本

無五字

仍疏稱餉絕逗留如故於是黃道周以大學士請募

兵江西德璟自請出關確察情形相機督戰上皆許之比至則疲兵弱卒朽甲鈍戈一無可為者德璟告病歸九月敵入泉州絕食死之

寧德死事傳

寧德死事曰湯芬

湯芬字芳侯

芳明史本傳作方

一字子建海鹽人

明史本傳作嘉善人鮑琦亭集

外編卷二十九跋明崇禎十六年進士錄作海寧人

崇禎十六年進士初知山陽縣

為漕撫所糾巡撫史可法總河王永吉交疏訟之弘光初

陞戶部主事督理杭嘉湖蘇蒿常鎮軍餉南都陷叛臣陳

弘範為敵安撫大將軍與芬夙好手書招之芬不答敵至

嘉興前吏部尚書徐石麟等倡義拒守芬父某分守西門

城陷死之芬益哀痛不欲生遂從海道涉溫台抵閩朝見

思文皇帝思文皇帝嘗於淮陰識芬歡甚誥贈芬父太常

寺卿而授芬四川道監察御史芬以衰經辭然於利害大

事知無不言諸勳爵惡之欲中以危地會閩陷芬避居嵩  
溪被執敵撫張存仁說以天時人事將授廣東雷廉道印  
芬固求死存仁憐之不忍殺比魯監國航海至芬潛往從  
之授某科給事中尋分守福寧

明史本傳作以監  
司分守興泉道

時海隅

義旗紛起水陸主兵者務相雄長將卒相攻殺芬切憂之  
謂國家方用兵諸君正宜同心戮力以紓大難今不務公  
戰而務私鬪徒勞無益適足以自戕耳道經寧德水際鄉  
適水師麾下張雲飛與秦川麾下黃際盛陳兵鬪雲飛  
求芬為解芬往見際盛說以息爭雲飛復哀甲出攻芬左  
右皆逃散芬自謂無他端坐不動冀復進說際盛以芬為  
賣己竟害之

贛州死事傳

贛州死事曰劉同升曰萬元吉曰楊廷麟曰郭維經曰  
楊文薦曰胡重明曰龔芬曰姚奇胤曰黎遠球曰盧觀  
象曰吳安世曰唐周慈

劉同升字孝則一字晉卿吉水人崇禎十年丁丑中進士  
第一人卽萬曆間探花劉應秋之長子父子鼎甲家計不  
敷蓋以祖芳興為黎平理刑平反冤獄不下千餘累代甘  
貧樂施故也同升官修撰以劾楊嗣昌奪情謫福建按察  
司知事尋復職十七年三月賊李自成陷京師時同升以  
憂家居聞變痛哭幾絕檄告江西十三郡舉義復讐編素  
別丘壘而出至南昌遇職方郎中楊廷麟大集紳士於澹

臺祠為大行皇帝發喪蠲吉誓師進發五月思宗立授同  
升左中允廷麟左庶子俱辭不拜弘光元年閏六月紹宗  
卽位擢同升少詹事加兵部侍郎總理江西而廷麟以東  
閣大學士召廷麟以國破君亡偷安海甸為非計辭不拜  
初同升廷麟與贛督李永茂起義會有滇廣兵過贛因疏  
留之滇兵者先帝時命中書科舍人張同敞用牙牌調發  
入京兵未集而京師陷思宗朝復敕雲南巡按御史陳蓋  
押赴南京及抵江省南京已失退回吉安廷麟以客禮待  
之滇將趙印選胡一青亦德廷麟奪勇建功頗多斬獲復  
立忠誠社於贛州招致四方之士於是王其宏王其隆劉  
明保彭曰趣等各率家丁自賚糧入社立功者幾二萬人

廷麟乃大亨士於城西率兵收萬安抵秦和復吉安全郡  
乃奉表至天興迎上赴贛隆武元年十一月永茂以憂歸  
而萬元吉以總制七省至贛與同升廷麟同心規畫時永  
寧王已復撫州建昌二府約同下南昌而同升以憂勞得  
疾未幾湖東告潰十二月同升病革卒於粵都事遂不果  
或曰同升殉難贛州諡文忠有口翰集行世第四子季質  
官兵部侍郎亦殉難廣西

萬元吉字吉人一字慎餘南昌人天啓五年舉進士歷潮  
州歸德永州推官以精明敏練著聲崇禎十二年楊嗣昌  
督師援楚疏請於朝陞大理寺評事監制諸軍瑤山之  
戰平東將軍左良玉大破賊獻忠斬首萬級元吉謀力居

多良玉心服焉獻忠與羅汝才合黨犯蜀元吉請檄諸將  
間道出梓潼扼賊歸路不聽其後賊逸出豫楚嗣昌始悔  
之嗣昌死元吉亦以內艱歸十六年補南京兵部職方司  
主事明年三月京師陷與大學士姜曰廣等援立思宗轉  
郎中疏請立大帥以圖恢復撤海師以固江淮又請復懿  
文皇太子故號並遜國殉難恩卹皆廟廊大議時江北兵  
民挑釁彼此邀擊元吉自請行營詔擢太僕寺少卿監理  
江北軍務會四鎮爭駐維揚稱戈閱鬪元吉馳入其壁責  
以大義多方排解諸帥乃和弘光元年五月南京陷襄皇  
帝踐祚元吉奔赴福州廷臣共推元吉有文武才擢兵部  
右侍郎督撫南贛兼七省恢勦諸軍事召大學士楊廷麟



入朝元吉代領其眾比至贛與舊帥曹志建等即日誓師  
十二月移鎮吉安屢戰屢克明年三月有驕帥不用命懼  
繩以法棄城走我軍勢孤遂敗元吉退歸皂口三日不食  
將赴河死永豐知縣林全春勸之曰吉安雖失章貢尚存  
公身繫安危義不當死元吉乃反贛州贛方大震有司攜  
家深避元吉之僕以其帑間走南安元吉麾騎追還錮帑  
公廨環之以薪而杖其僕以不請命之罪於是贛人志益  
堅定高進庫以兵十餘萬猝至我師未集僅得鄉勇千餘  
更番出戰城上礮木砲石雨下死傷枕藉敵氣大挫徙屯  
下沙富元吉以血書四出請救七月吏部員外龔芬明史  
萬元

吉傳作吏

部主事

兵部主事黎遂球同水師副將黃志忠游擊羅

明受

明史元吉傳作水師帥羅明受

率兵六千至文潭壩兩戰皆捷舟大

膠沙敵使善泗者鑿船因縱火以騎突我師遂大敗廷麟時既內召聞報亟反檄總兵張琮張安率師數萬順流而下與戰於河復大敗元吉與贛人相讐意氣不衰上嘉其義下詔褒慰之凡贛民之老者賜酒脯壯者人進一級免征徭一歲改贛為忠誠府加元吉特進兵部尚書太子少傅爵忠誠伯予世廕元吉上疏力辭八月柯永威新至軍遣人來語延平既陷車駕蒙塵勢去時窮不降何待元吉數弩射殺其人時贛被圍已六閱月兵單食匱元吉恐人心漸弛慰之曰事勢至此義不能生汝曹若懈當斬吾首以獻保全一城性命贛人感涕嗚咽守禦益堅十月朔黃

霧蔽天雨雪交作陣士寒困會舟師失火延燒火器樓櫓  
略盡敵乘夜潛上新易戍卒比覺騎已畢登城陷士民巷  
戰死者數萬城遂屠有死士數十人擁元吉東關渡河元  
吉顧左右曰為我謝忠誠父老城破民亡元吉何忍獨生  
遂投水死朔之四日事也年四十有四永曆元年詔贈特  
進太師上柱國光祿大夫建極殿大學士吏部尚書追封  
進賢伯諡文烈予祭十二壇遣官造葬敕建特祠於贛又  
傳旨從祀周濂溪祠子象玄象赤象黻俱世廕錦衣衛指  
揮僉事餘自楊廷麟以下恩卹有差

楊廷麟字伯祥別號機部清江人崇禎三年以貢應南闈  
試中式四年倪元璐為同考官以第一人薦主考周延儒

不允置之第二選庶吉士改編修十年分較會闈十一年  
晉經筵講官時楚寇張皇詔遣閣臣為督師廷議稱廷麟  
知兵加兵部職方司郎中出為軍前贊畫弘光元年六月  
南昌陷敵騎直抵萬安所爭者在贛水口時廷麟與大學  
士劉同升李永茂吏部尚書郭維經等倡義恢復吉安萬  
元吉從行在至贛而永茂以丁艱去同升以勞瘁薨是時  
廷麟內召聞吉安警留駐贛州城外日上疏言援吉防贛  
事宜吉安失守廷麟調張安等兵至贛再戰再敗遂入城  
與元吉同守贛者其力為多城陷死之永曆元年追贈新  
淦伯諡文正其門人彭銳字魯菴寧都諸生廷麟初舉義  
湖東恢復吉安所屬州縣銳從幄中贊畫以糧盡援絕廷

麟屬孤於銳銳矢必全之廷麟死事後銳挾其孤逃之深山與虎豹爭其軀命與捕健差其後先幾不獲免朝士嘉其義上之得授職方司主事銳嘗疏表廷麟大節及請卹殉難諸臣再轉本部郎中奉恩誥歸壽其母永曆四年春寧都陷或勸之降銳曰吾以諸生蒙國恩可謂不次顧不得如盧子占耶方從楊公於地下矣冠服北拜與妻李氏同縊

郭維經字六修號雲磯龍泉人天啓五年進士初授行人崇禎初明史本傳作崇禎三年擢南京監察御史掌河南道巡視下

江兼理屯田馬政諸大猾根株連結鋤治不少貸吏部尚書王永光明比罔上極論其推陞不法數事上鑄永光秩

並黜維經所糾不應推之兩廣總督尹同臯邊撫楊述程  
維經又疏劾大學士溫體仁不職請卽罷斥上欲以禮終  
始大臣下旨切責撫寧侯朱國弼自倚勲臣事多不法維  
經條列數十罪上之時四方多故徵發旁午餉餽弗繼守  
令以催科為能維經請蠲積逋以收人心以固邦本凡數  
十疏言皆痛切懇至上雖不能盡用然常念其忠謹意特  
眷注之丁內艱歸服闋以上命趨復原任未幾以疾辭簡  
討汪偉以闖獻二賊肆逆請建閩於江楚間舉人望所屬  
堪倚大任者四人推維經及袁繼成成德上以維經久弗  
赴召遂用繼成開府潯陽十六年冬起用為原官弘光初  
授應天府府丞改大理寺少卿晉僉都御史協理院事馬

士英朱國弼群奸擅命將卑阮大鍼以軍政因授兵部尚書維經疏言先皇帝親定逆案大鍼實為渠魁今加之重任無論駭四方觀聽如宗社生靈何疏上卽引疾歸父老子弟遮道哭留沿江許大慟而大鍼則已遣賊邀劫於江上矣微服奔望江縣僅以身免隆武初卽家拜工部侍郎於途轉兵部侍郎至天興晉兵部尚書兼吏部尚書總師援贛維經受命沿途募兵得八千人六月至贛亦入城同廷麟元吉為堅守計十月四日城陷死之長子應銓字甄孟次應衡字平仲姪應煜字扶生皆貢生隆武元年冬俱授車駕職方郎受命募兵扈從以道梗聚兵邑中自守敵招之不應敵吉安守將劉一鵬賄其中軍劉金因得以間

道破其營壘應銓策馬突陣墜崖而死應銜被執一鵬以  
禮待之曉譬百端終不聽巾服言笑自若也械至南昌敵  
巡撫章於天提督金應桓解其縛勸降又不聽益奮罵於  
天悵然歎曰便宜此後生作一奇男子去也臨命引頸受  
刃顏色不變時年二十八應煜為敵巡撫董學成所殺有  
諸生彭之珩者字惠生高進庫兵至不屈維經之門人也  
楊文薦字又如明史本傳別號客有京山人崇禎十六年  
進士授南京武選司主事明年三月京師陷烈皇帝崩文  
薦徒跣走孝陵慟哭仆地不能起見者傷之弘光初文薦  
在散曹奮然抵掌談邊疆大事馬士英等嫉之南京陷文  
薦奔杭州旋入天興伏闕下口畫立國規模戰守形勢一



時主臣環拱而聽授兵科給事中尋陞本科都給事文薦以閩疆僻陋諸事草創將驕兵情孤危無倚日繕疏條奏中外機宜剴切指陳執政左右多側目以為不利於己卒擠之於外隆武二年丙戌春奉使出承天道繇江右至贛水時萬元吉督師贛州聞文薦至喜甚特題文薦兵部右侍郎兼都察院副都御史巡撫南贛文薦己卯出元吉門其忠義饒膽略元吉素知之故引與協守云贛州圍久文薦日夜登陴哀甲而卧以忠義激勵將士十月三日夜半城陷率狼兵數百人巷戰黎明左右勸之從西門突出文薦曰城亡與亡去將安之揮令散去遂自投於園池為一騎兵所挽得肘後印驚曰是巡撫楊公取執至南昌敵提

督某親解其縛曰公守贛撫臣非某等敢行加害必請於  
經略上聞公宜識時毋徒自苦為也文薦曰吾奉君命守  
贛城亡則死毋多言懸我頭於贛西門以謝贛人吾志畢  
矣絕粒數日不得死使者以酒穀進揮之或時推案撞碎  
之日狂呼以頭觸柱或自投於牀冀折脅死嘔血日數升  
間慷慨悲吟以所嘔血於壁上淋漓書之形枯骨立鬚眉  
脫落明年元旦自知不起強扶下榻南向哭拜畢就榻整  
冠正襟襖而卒文薦事親孝癸酉省試聞父病馳歸母疾  
篤刲股以進鄉黨皆稱之其忠蓋有本云著有聽湘集  
胡重明字蓋卿鄱陽人繇貢為贛州教授攝府事城陷自  
刎於堂上

龔芬字仲木新建人崇禎十六年進士初授廣州府推官  
巡按御史王化澄委之察覈數十年積案決旬清結以治  
行最擢吏部驗封司主事轉員外隆武二年贛州告急芬  
與監軍御史姚奇胤職方主事黎遂球糾集水師數千人  
分為五營兼督副將黃志忠兵三千游擊羅明受兵三千  
度嶺援贛贛陷芬死之

姚奇胤字有僕錢塘人崇禎十三年進士知南海縣陞監  
軍御史同龔芬黎遂球率水師援贛城陷不屈死永曆二  
年十一月十七日奉旨龔芬姚奇胤以死勤事着與贈廕  
誥命

黎遂球字美周番禺人天啓七年舉於鄉崇禎中詔行保

舉參事陳子壯薦之遂球以母老辭京師陷遂球聞變亟  
破產治鐵銃三百餘函及火器藥弩之屬解赴督師史可  
法軍以佐北征之用復上書當事請儲餉練兵以保粵會  
而躬詣富家巨室勸輸公弩激揚忠義一時勤王之士因  
而興起當事大夫倚重焉南京陷建議迎立桂王桂王今  
上之考也既聞思文皇帝卽位喜曰高皇帝九世孫也大  
學士何吾騶起首輔遂球草中興碩畫十事以援贛為先  
吾騶以聞上命遂球以兵部職方司主事練習兩粵水師  
帥之援贛時隆武二年四月也贛州圍急遂球與主事龔  
芬御史姚奇胤副將黃志忠游擊羅明受推官歐冢賢提  
水師數千度嶺既至贛約連諸部為水陸夾攻之勢文潭

壩之戰明受先鋒所殺傷首虜亡慮數千舟大水淺膠沙  
被焚遂球方與志忠督兵城下合總兵張琮張安援兵大  
戰三日敵屢口挫相持甚急明受兵旣潰敵將高進庫提  
兵十餘萬并力來攻琮安等眾寡不敵亦遂敗狼狽兵聞  
之逗留不進遂球軍孤乃入城與萬元吉等為死守計敵  
連營數里為長圍日夜益兵遂球督發石車火箭之屬逆  
燒攻具敵人死傷蔽地章水為丹贛城故高峻三面據險  
號虎頭城民人率懷忠負義無老少乘壩決命以樓櫓為  
家遂球與元吉等鼓厲有方日以數千人更番出戰兵一  
民三爭先死敵遂致大斬首功敵計窮知無懈可擊撤兵  
屯下沙窩八月車駕至延平御營驚潰敵語以國滅主亡

不下何待遂球與元吉等憑鬱孤臺罵之敵將柯永盛新  
至窮極攻擊十月三日夜黃霧蔽天風沙大作陣士對面  
不相見而號礮暴發舟師失火延燒火器樓船至盡礮聲  
震天諸軍崩恐煙霧中相踐踏敵乘間上城斬易塚夫城  
中大亂遂球率死士數百奮呼巷戰脅中三矢墜馬騎褫  
其衣見所佩敕印曰官也遂球大罵被數刃以死年四十  
有五弟參將遂琪亦同死遂球嘗有從軍詩云壯士血如  
漆氣熱吞九邊大地吹黃沙白骨為塵煙鬼伯欲復厭心  
苦肉不甜城垂破猶吟哦以自壯也今上卽位詔贈太僕  
寺正御賜祭葬廕一子入監讀書又詔以遂球與元吉廷  
麟芬奇胤為五忠敕建五忠祠於贛明受字四維番禺人

初為海盜遂球言其驍勇請副使湯來賀招之使擊白旗賊黎國忠以自贖國忠平題授水師遊擊文潭壩戰脫歸廣州將糾花山之眾圖再舉為雙所害冢賢字天駒南海諸生狀貌瓌偉負才武遂球薦授監紀推官贛陷與弟思賢同戰死遂球善屬文著有蓮鬚閣集數十卷又文物當名若干卷

盧觀象字子占贛縣人以貢入南雍再試不第謁選得河間管河通判天啓元年改天津衛屯田判官陞河南清軍屯田同知四年再轉左軍都督府經歷遂乞休致先是萬曆中邊事方殷轉漕不繼戶部尚書汪應蛟巡撫畿南始創屯田之法已而以潦中廢歷十餘年左光斗繼任議修

屯政觀象佐之張慎言嘉其才特題本府軍田同知疏曰  
管河通判盧觀象者身任屯事條為九議一原始末辨壤  
地以明初闢之繇二准得失破舊議以明不應廢之故三  
祖舊議亟濬築以圖不廢之基四立章程召佃種以圖長  
興之業五立官莊廣陸種以資大行之籍六立勸輸示補  
償以佐始興之缺七稽舊牒置農器以備大興之用八簡  
賢能專事任以廣長興之治九歸課賦明輸納以安佃種  
之心前屯臣已具疏以聞矣乃論者謂濱海斥鹵水旱不  
時勞不補費然觀象業有成算早夜拮据及秋納稼獲稻  
穀三千二百有奇秫粟二千四百有奇凡耕熟水田六百  
五十畝旱田六千一百五十畝基造官房廬舍圍房祈穀



壇廟百有餘口他如築圍濬海開河修隄水車戽斗之制  
皆有法今觀象經營與前九議若合符節且津門而南數  
萬頃固不論如河間之龍化橋任丘之隄北交河之高川  
獻縣之淮鎮青縣之滹沱靜海河西之王家口子牙河皆  
可用津門之法將三輔汙萊沮如之場盡為崇墉櫛比之  
區是漕轉江南十鍾僅一石畿輔一石可當十鍾矣疏上  
觀象晉階同知值璫執方熾觀象懼禍遂以左軍經歷致  
仕崇禎初袁崇煥經略九邊道過贛郡觀象與之忼慨談  
兵崇煥自以為不及欲屈之幕中不答十六年秋賊張獻  
忠破袁州吉安傳偽檄至贛郡人危懼觀象力議斬其使  
倡率拒守賊遂却弘光初上書馬士英謂今國家根本無

過江東而扼要尤在淮濟徵兵置戍經歲不集盍若急募  
津淮一帶鹽徒可得數萬其人勇毅敢鬪更訓之以方用  
其人以守其地則聚而難散且出沒泊汭間示以不測我  
兵又得所恃江東可長保也士英不省敵濟河渡江所至  
莫有當者贛圍急觀象力疾行間七閱月城陷冠帶北面  
謝率家人四十餘口至園西池上一子最少名堯年十四  
先赴水妻妾婢僕咸相繼死觀象乃自投池中時年七十  
有四

胡安世字求寧汀州歸化人諸生隆武二年大學士楊廷  
麟疏薦請以推官銜監紀命下卽日就道時廷麟在贛州  
園中安世亟渡河入見多方畫策廷麟甚倚之十月朔外

攻益急安世力疾登陴礮中左膊嘆曰吾死矣君恩莫報  
呼左右為正衣冠扶而北拜拜已遂死年五十有三妻朱  
氏被執自絕飲食者八日無何發演武場會大風雨主者  
有封刀之令遂免安世喪還朱氏撫棺大慟嘔血以死  
唐周慈字釋純零陵人氣志慷慨尚理學萬元吉司理永  
州甚器之崇禎十六年流賊入湖南官民驚潰周慈倡募  
義士走粵乞師恢復永州元吉開閩贛州周慈往謁元吉  
承制署贛州通判委以司餉城陷與元吉同沉於江  
屈大均曰溫蘭曰忠誠自四月被圍至於十月四日以其  
創殘飢羸之餘堅守半載上下一心効死勿去蓋自敵入  
中原攻之久守之堅未有若斯城者也乃或謂萬公吝賞

不聽其民渡河一戰自致困敗然公嘗有言矣曰我之不使民輕出者民但知我之愛之不知實不能戰也嬰城而守易為功渡河而戰難為力度吾銳士不滿千倘一過河敵麾鐵騎感之無遺類矣吾誰與為守乎嗟夫萬公之所以為忠誠民計者可謂至矣公之死於贛人不負贛人之死亦於公不負矣當時同公死者復有太常寺卿彭期生庶吉士萬發祥主事符遯中王其隆曾嗣宗監紀通判莊以涖父子鎮守贛州總兵陳烈舉人劉曰任貢生符述中王其宏王純月王世光楊文琦生員尹政言吳時彥文琦字玉宸此皆未詳其行事不能立傳者

興國死節傳

興國死節曰姜一洪

姜一洪字開初會稽人

鄒案浙江通志作餘姚人

萬曆四十四年進士

初以武學教授遷國子監博士陞禮部主事調吏部考功司郎中嘗南京間曹也久之改江西副使分守九江道駐節饒州捐去苛細一切以寬簡治之令有司崇尚德教察

鄉民孝弟力田者核其實府縣敦促赴道治一洪降階勞

問賚金帛獎厲鄉民聚觀無不相勸為良者

良鄒本作善

饒俗

多溺女以故女少士民或中年不得配又惑於形家言停

舊木不葬下令溺女與殺子同律停舊木與暴棺棄屍同

律里鄰不舉坐之

舉鄒本作察

居三年大治遷河南禹州分巡

道右參政值霖雨河決民大飢流賊犯鄰郡飢民多揭竿

應者縣捕之急逋逃滿道路一洪設法以賑民稍還里賊

逼葉縣及鄆陵見所在有備不得入賊帥老回回分犯河

北回回鄆本巡撫樊某以軍事屬之樊鄆本一洪遣老弱

張幟分布要害而自將步卒千人前行賊詢之知一洪能

軍舍之去遷福建按察使遷鄆本以勤慎自持八屬肅然

凡滯獄疑讞立為之決囹圄皆清遷廣東右布政司使職

兼清軍清核得千餘人別立隊伍訓練之既而進左準量

平衡官吏輸餽者解鄆本朝至夕發完納甲諸省入覲舉

廉卓艱歸甲申國變思宗立推太僕卿不赴紹宗即位於

閩乃亡從之連進吏部右侍郎戶部尚書值滿兵踰浙上

使平虜侯鄭彩守關自將兵三千從延平移之汀州命一  
洪前行峙糗糧以俟而仙霞兵潰上潛幸不知所之一洪  
徒步次興國榔木村去贛百餘里仰天嘆曰嗟乎天意如  
此偷生何為遂赴水死鄒崇浙江通志時隆武二年丙戌  
十一月六日也諸生鍾國士哀之與榔木菴僧了緣為合  
殮如禮□一洪友胡重明教授贛州聞一洪死大哭三日  
城陷自刎於明倫堂





福州死事傳

福州死事曰吳聞禮曰楊履園

吳聞禮字去非休寧人

東南紀事卷四作錢塘人結琦亭集外編卷二十九跋明崇禎十六

年進士錄同此

崇禎十六年進士乞假省親明年春

明年春歸京本作甲申

師陷與同邑學士金聲

與同邑金聲

謀起兵不果弘光元

年五月

弘光元年五月

南京不守列郡以次潰陷聞禮奉

其父母南奔福州母程氏以年老不欲遠行聞禮留其兄

事之至福州授某料給事中

鄭崇某料南疆逸史作兵科

隆武二年

二年歸本

晉都察院僉事口口奉使建寧福州陷走依營

兆恒於銅山敵跡之又走張村被執脅降不屈死之

結琦亭集

跋崇禎十六年進士錄云休寧吳聞禮殉永豐

年三十四後三日

歸本無

家人購

其首以歸雙目炯然猶視合諸體良是乃癸十一月十七

日也十七日  
本七日

楊履園字萊民福建海澄人海澄原作鎮貴州按察使聯

芳之子也崇禎十七年崇禎十七年京師陷履園年二十

有一為諸生慷慨有殉難心以父年耄不果隆武二年隆武

二年鄒本閩關不守與其死洪思相持慟哭謀所以不敢

生未得也永曆元年秋鄒本作閣部熊汝霖奉魯國主從

南東退師順流下據太武集戰艦圖復濱海署履園兵部

職方司主事履園召募山中尅期應之事未就有宋琳者

佯與約結要金五千未之致竟泄其謀於楊鎮帥履園被

執至學宮挺立中階下拜先師起號高皇帝烈皇帝而不

跪帥怒鞫之但言不願作兩朝人物事之有無不必問也  
縱步安閒視琳在側若無見也帥置之獄更定遣私人回  
回朱姓者出之誘以要賂履園未至學宮朱姓從後害之  
年二十四妻蔡氏知事之泄就井婢抱持之曰腹中有妊  
倘禍不及家人幸生男忠義有後蔡乃止歲乙未冬逃亂  
海濱騎猝至蔡持匕刎頸未斷以右手指探喉將鉤而絕  
之指入而仆騎見之怒揮刀裂其頂又斫眉斷耳死矣已  
頃騎退有醫郭梅台者見之歎曰有忠臣必有烈婦不暇  
自尋其子女招一道婆扶而納之牀登山採龍舌藥敷治  
之夜半甦閱十日遂痊起如平人年至七十餘子有兩孫  
蔡能詩有招亡女一篇漳州人傳之其弟名棊字中肅龍

漢人戊子亦以諸生從兵部盧若騰軍署贊畫兵敗死於  
施氏之水時年二十

前廣州死難諸臣傳

前廣州死難諸臣曰蘇觀生曰霍子衡曰梁朝鐘

鍾原作鐘

據明史諸王列傳明紀及喻園集改

曰梁萬爵曰余述之曰馮協颺

蘇觀生字宇霖東莞人年三十始為諸生提學曾化龍愛

其才擢充拔貢崇禎十年工部郎中張一鳳特疏保舉授

無極知縣無極兵火之餘邑無城官無署觀生悉心安撫

立堡築城期年流亡畢集以卓異陞永平清軍同知加銜

戶部員外督餉登萊海上監紀天津衛水師十七年三月

京師陷賊李自成所署偽官至天津觀生執而戮之率輕

銳數百人航海而南思宗立陞戶部郎中督理蘇嵩常鎮

四府糧務太監高起潛疏薦授監軍副使弘光元年五月

敵薄南京忻城伯趙之龍先為降表邀朝列署名觀生弗  
署單舸走浙中道遇唐王王日角龍顏生有奇表又天姿  
英毅睿哲寬仁觀生知為中興令主因與總兵鄭鴻逵等  
奉王入福州觀生首定大策文臣黃道周張家玉武臣鄭  
芝龍鄭彩等贊之王遂以閏六月七日監國二十七日即  
皇帝位是年乙酉改為隆武元年即弘光之元年也晉觀  
生吏部侍郎兼東閣大學士總握機務賜銀章一其文曰  
天賜忠臣尋命提督儲賢館分文武十二科惟觀生進退  
會靖江王兵起觀生授計廣西巡撫瞿式耜使其黨執之  
上以觀生有定變功益深倚任觀生疏言今者內患雖寧  
外憂方大然閩中門戶競起將相不和諸勳臣爵皆五等

富貴已極無復有雪恥復讐之心非皇上親總六軍以張天討恃彼二三庸懦首鼠不前勢不能恢拓皇輿尺寸請卽先幸贛州據三省咽喉以為進戰退守之計上是其言諭之曰朕不入閩不興朕不出閩不成命觀生先往贛州修繕城池以待加觀生吏兵二部尚書太子少保武英殿大學士使瞻奉南北帝王山陵安定楚豫兵民經理浙直文武聯絡川廣兼督閩粵雲貴軍務敕廣東歲解銀十萬兩聽觀生軍前支用文武自道府副將而下得專生殺除授賜上方劍便宜行事祖之殿門諭之曰先生清端有操沉毅善謀朕以師尚父相期燕罷君臣揮涕而別是時南昌吉安並陷敵騎將窺贛州觀生至贛會大學士楊廷麟

兵部侍郎萬元吉亦至觀生遂移節南安督催諸道官兵  
厚集贛州為固守計二年九月車駕親征至上杭為敵所  
襲御營十萬餘人不戰而潰次輔楊鴻請服袞冕以代上  
微服行諸臣或遁或降已而贛州亦陷觀生聞變欲赴潮  
州迎駕不果乃返廣州聞桂府永明王監國肇慶尊上為  
思文皇帝觀生喜曰國有君矣遣兵部主事陳邦彥奉箋  
勸進且請東幸廣州初兩廣總督丁魁楚以除靖江謀逆  
功封平粵伯而觀生驟起諸生以除定策入閣柄用書牒  
往來責望疑似之間遂成嫌隙至是聞觀生旋師懼其逼  
己因奉車駕遷梧州會思文御弟唐王聿錡者錡原作鏗  
據明史諸

王列傳蘇觀生

傳及明紀改 至自閩中觀生因迎立之以十一月朔即



位廣州

明紀云十一月癸卯朔  
丁未王自立改元紹武

謂永明王今始監國我既

立君則永明王必將退守藩服此先發制人之舉也始今  
上之考桂王自衡州避賊梧州思文未立粵之人欲奉桂  
王王固執不可上有異表入朝於天興思文見而嘉嘆稱  
有人君之度封永明王上杭之變或傳思文潛入於海粵  
中臣民咸擁戴上是時桂王與上兄安仁王皆已薨逝而  
上辭讓再三寧聖慈肅皇太后曰國口患小以吾兒過於  
仁厚非撥亂才吾母子播遷及此圖朝夕自全耳宗廟之  
事願更擇能者諸大臣叩首力陳天序懿親人心繫屬以  
承顯皇之耿光以紹威宗之大烈今王是賴當此宗社傾  
危之際不宜久示謙退使神器無歸本支不接以失四海

臣庶之望王默然又數日乃許盟國先是邦彥至梧朝上  
啓箋勸進而夕聞唐王僭立舉朝且疑為間既召對答奏  
忠誠上始信之命齎敕書還諭邦彥遺書觀生謂朝廷將  
召楚師發狼狽兵悉會廣州城下不獲已則寧撤南雄戍  
守旋兵內向我能代彼拒敵耶若能削號歸藩不妨畫疆  
為界今敵方窺伺門庭而我乃相殘堂奧所謂為秦相割  
而秦曾不出力為秦相烹而秦曾不出薪者也今羽林之  
軍已下羗羊峽矣梅嶺之兵亦相次返矣公之諸將亦有  
如龍倫却時登趙千駟劉昌業趙繼宗李志義其人者乎  
早魁楚有辭於上矣曰輔臣蘇往與臣心嫌比相見紅梅  
已推誠投分臣心折其為人瀕行又謂邦彥曰有如此河

必無相貳都督侯性則曰臣願以百口保蘇輔臣然則公亦可以釋然於心矣公今定策兩朝竭忠所事其將為一己之私乎抑為二祖列宗出其心力乎觀生得書不省初唐王至廣州志在避敵亦以為思文皇帝在焉及是僭位甚不怡先是霖雨積旬至十一月朔而霽天日煥然異雲鬱起群小詡然皆謂興主之符也卽日爵觀生建明伯治本兵事遷顧元鏡東閣大學士與關捷先曾道唯王應華等並入內閣分攝六部尚書事於是上命兵部侍郎林佳鼎率總兵成大用李明忠等以舟師問罪廣州觀生遣所署總兵林察拒戰於三山口佳鼎為察所賣一軍覆沒觀生於是志益驕方是時廣州劇寇陸有花山水育石徐鄭

馬四姓觀生悉招降之以充禁旅而彼輩兇悍難制白日  
戲嬉殺人懸肺腸部府之門莫敢呵問七門外號令不行  
觀生使所署戎政尚書簡知過日夕椎牛醢酒導以忠義  
眾降徒稍稍感輯方欲整齊訓練之未暇也敵帥佟養甲  
李成棟既襲破潮惠二州因用二州印符日為文書給廣  
州潛率精騎易裝來襲十二月望唐王方臨雍釋奠百官  
畢集或報敵騎東至觀生不信三報斬三人而敵騎已入  
東門矣居人猶謂花山諸盜來受犒也敵登城以鳴鑼下  
射脫兜示辦人始倉皇驚走觀生亟召兵搏戰會材官勁  
卒皆西出禦險高要倉卒不集敵從城上垂鉅練引騎登  
者數千觀生僅得護衛兵數百人使余述之督戰力竭死

觀生過吏科都給事梁鏊曰聞主上蒙難有諸吾等死耳  
鏊曰然觀生入東房鏊入西房拒戶久之觀生度鏊必詐  
稍留聽鏊鏊故意抗喉呃呃作死聲佯推藉足几墜地久  
之聲寂然觀生乃書壁上曰生既無成死亦萬古原注云一作苦  
節報高皇恩憐老母東南紀事云乃大書大明忠臣義士固當死九字於壁遂縊而  
死明日鏊獻其尸以降捷先道唯等並降元鏡為養甲所  
寵則大書其門曰大清學士云觀生死年五十無子有僕  
木進隨玉田人亦縊於側

霍子衡字覺商南海人漳州同知騰蛟之子繇萬曆三十  
四年舉人任海康教諭陞國子監博士戶部司務歷主事  
員外郎中出為袁州知府清約愛人甚有聲流賊陷城脫

走歸廣州隆武二年十一月唐王立起太僕寺正卿次月  
望敵兵潛襲廣州破之王及於難子衡與甥梁朝鍾慟哭  
相訣乃謂諸子曰吾國之上卿君亡與亡吾今從君汝曹  
亦當從父皆哭拜曰如大人命諸媳姪亦皆如命子衡於  
是朝服望闕北拜次向宗祏拜季子應芷之妻區氏請曰  
卿大夫之家不宜無後死易託孤難耳公有媳三而一媳  
無子今有子之二媳宜留無子之一媳宜死惟公命之時  
子衡長子應蘭有子二仲子應荃有子一皆幼故區氏以  
為言而應蘭之妻何應荃之妻徐皆慷慨與區氏爭死莫  
肯獨生子衡乃命長媳何氏留撫諸孤且須俟死須上張  
本有緩字旦日子衡步過鄰人辭以死應蘭亦往鄰人止之曰子

家尊受國厚恩子可無死曰父死君子死父奚為不可應  
荃應芷繼至皆辭鄰人大驚往視之子衡方與諸子列坐  
後園池上鄰人至執手笑語揚揚如平時有頃報騎入子  
衡揖別曰行矣遂躍入池妾莫氏繼之應荃與徐氏繼之  
應芷與區氏又繼之應蘭大書壁上曰為臣死忠為子死  
孝為女死節以報國恩顧謂其女十姑曰汝雖幼獨可以  
不死乎以腰帶擊之赴池莫氏女奴掌年方十餘後至哭  
曰娘何不待我亦赴池死明史子衡傳云應蘭借妻梁氏並死於是霍氏一  
門死者九人子衡一此字疑誤妾一子三媳二女孫一婢一鳴  
呼其大可哀也已為城陷之次日越二日諸屍浮出莫  
氏並子衡徐並應荃區並應芷十姑則並應蘭女奴掌並

莫次序不亂顏面如生衣冠整然敵帥驚異之榜曰合門  
死節之家應蘭字偕生應荃字仲偕應芷字季偕皆府學  
生員永曆二年詔贈子衡太常寺正卿三子皆贈禮部主  
事妾媳女孫皆贈孺人廕孫履道入監讀書蓋何氏撫之  
得全生者子衡旣死越九月從子師連以戰死清遠越十  
一月從孫達芳以全髮不屈死廣州人謂霍氏一門先後  
有光云

梁朝鍾字未央番禺人崇禎十五年舉人曾祖士楚以知  
縣從總兵官戚繼光討倭有功超擢貴州參政祖父俱名  
諸生朝鍾生而聰慧十歲卽能為詩古文有奇童之目為  
人做僮不羈敏口善辯雖在尊貴人未嘗少屈都給事陳



熙昌有從子奪其祭田有司不能直朝鍾方為白衣童子  
輒投書譙讓熙昌熙昌大驚造謝曰子天下士也後知縣  
張國維試童子熙昌特書薦之曰是嘗罵予然董賈之流  
邑中材士無與比國維閱其文果善拔置第一嘗赴鄉闈  
策論所言天經地理絕奧博主司疑以為老出闈乃英弱  
士自恨失人請相見朝鍾弗見也兩廣總督熊文燦延為  
兒子師長揖軍門角中傲岸時贊議機密多見採用文燦  
甚倚重之崇禎十二年文燦奉命督勦流寇與之偕行至  
安慶辭歸史可法馬士英阮大鍼皆嘗下交朝鍾弘光初  
三人皆欲疏薦於朝辭之隆武元年蘇觀生當國亦徵朝  
鍾又有特薦纂修國史者並辭之謂客曰吾頸有刀痕寧

見否客大驚訝朝鍾曰今日事行將及矣二年冬唐王僭立廣州授翰林院簡討有賀之者曰國事至此朝鍾官亦死不官亦死是當吊之何賀為尋遷國子監司業

明史諸王列傳

作祭酒聞惠州陷與其舅氏霍子衡約死十二月望敵騎襲破廣州朝鍾赴池池水淺僅僕掖之以出俄而兵入室中叱使歸降朝鍾大罵被斫數及不死展轉地上兵去匍匐取小刀自割以死年四十有五當城未陷朝鍾數謂其門人曰汝輩今欲成仁乎城陷衣冠赴泮池而死斯成仁矣其志如此

梁萬爵字天若番禺人少貧傭書養母弟萬宗負販佐之以孝聞隆武元年舉於鄉唐王僭立官拜行人司行人敵

兵且至謂其友曰賴國家之靈苟竊一命以慰老母事不濟則宅後有池惟君收吾骨焉廣州陷遂辭其母以死越日萬宗歸見兄浮屍池上擣首慟哭亦就其旁觸死

余述之廣州西濠里人初為守備一日新沐謂人曰禿賊若來吾與是髮俱古矣人莫之信比敵人入廣州諸軍無與戰者述之獨率數十人巷戰斬敵御史一人騎四人於東門內力竭躍馬冒陣而死同日廣州左衛指揮張啓賢與其子某衣冠投井死左衛達官指揮羽騰龍自縊死啓賢字象之騰龍字冲漢

馮協颺字悅賡南海人廩生廣州陷拜辭其父以死其父曰當路公卿大夫受恩深矣猶有所待以庶幾一當書生

今何為者曰彼等烏知大義兒志決矣哭而入疾驅妻女入井而自懸於樹其母救之未死旦日敵兵入室勒其父金帛不得殺之協颺慟哭曰吾縱不死於君寧可不死於父乎於是又縊家人救之則自齒斷其舌以血作絕命書卒縊而死同里監生周書聞之亦縊書字刪父副使裔登之孫父舉人夢鯉

屈大均曰前廣州死難者何死僭國之難也言僭國者何以唐王不當立而立故謂之僭也當是時上而監國梧州諸藩王皆同心翼戴奉以為君矣唐王不能力辭諸臣之請遂爾稱戈鬪鬪骨肉相殘是唐王者二祖列宗之罪人非惟上之罪人也而諸臣陷唐王於不義抑又唐王之罪

人也傳曰觀過知仁國不可以一日而無君使觀生不上  
笈監國則唐王嘗受思文之命居守天興兄終弟及其亦  
何病焉惜也朝勸進於西而夕擁立於東干戈相見禍起  
蕭牆竟以堂堂天朝拱手而與讐敵也觀生一死誠不足  
以塞責然而死雖為唐王亦為二祖列宗其擁立也私其  
死也公則謂之忠也亦可自子衡以下皆仕於唐王以死  
者故合為之傳



督師死事傳

督師死事曰黃道周曰傅冠曰何騰蛟曰揭重熙曰陳瑾

黃道周字幼玄

明史本傳作字幼平

號石齋漳州鎮海衛人天啓二

年進士選庶吉士陞編修逆黨魏忠賢始橫同館文震孟

疏論之例經筵展書官手書膝行道周以講筵道尊平步

而進忠賢目攝之不能難久之以東林見廢崇禎二年起

故官明年出典浙江試晉右春坊右中允疏救舊輔錢龍

錫坐曲庇鐫級龍錫竟以得減死論道周垂出都

明史本傳作五

年正月

以易數上陳忤旨褫職五年起論德掌司經局事時

廷議反復至以東林比崔魏道周切指時事疏入忤旨罷

歸九年起復原官因星變請平大獄求直言謂五月朔夕  
熒惑與日同在鶉首參火之分三辰皆火也又以朔夕合  
火宜修平火政稍節威光使火不為厲明春熒惑在於大  
火徘徊氐房心尾之墟宜慎火器逖瑟戎務十年同考會  
試歷詹事府少詹諸所論奏如慎喜怒回天省刑補牘惟  
申明司經掌職稱旨六月兵部尚書楊嗣昌改禮部兼東  
閣大學士仍署兵部七月命嗣昌大祀大慶暨傳制頒詔  
諸大典不與朝講召見如常服隨班時嗣昌母服方五月  
工科給事中何楷劾嗣昌上切責之先是吏部會推閣員  
止及詞臣資序上不允命并在籍守制者蓋嗣昌為陳  
新甲地也已而特召新甲為兵部右侍郎總督宣大道周



上言臣雖懦弱然自二十躬耕手足胼胝以養二人迄四十餘削籍後徒步負擔一二千里不解屣屨今雖逾五十然非有妻孥之奉婢僕之累所纂書數卷已移月可畢筆札千楮均為報恩天下即無人臣願輟清華以執鎖鑰何必破非常之格拔不祥以玷皇化哉方今莩或漸次箕尾是為燕分九十月交當南斗口思患預防聖人之所垂戒上不憚一日召對道周顧極詆嗣昌奪情非孝上怒謫道周江西布政司都事

明史本傳作賤道周六秩為江西按察司照磨

修撰劉同升

趙士春都給事何楷試御史林蘭友各疏救之而劾嗣昌俱謫調有差適解學龍巡撫江西甫入境疏道周忠孝之至詔道周與學龍並逮主事馬思理董養河等相繼疏救

皆得罪既入都與學龍並杖八十案以偽學欺世律大辟  
學龍坐褫職刑部尚書劉澤深力請減戍不得部臣葉廷  
秀者故不與道周交復直之疏論痛至並逮廷秀杖之削  
籍為民

明史道周傳云戶部主  
事葉廷秀赦之亦下獄

太學生涂仲吉袖疏詣通

政司格不得上仲吉並遂劾通政使施邦曜疏聞廷杖論  
戍邦曜坐落職道周下獄未幾河南府陷福忠王殉之嗣  
昌以失律喪師自殺上內念道周之非妄會周延儒復起  
見上陽為不知道周者曰聞道周博學負文名陛下宜自  
赦之使天下驚聖度汪洋上是之尋復其官並赦為道周  
而得罪者比召對退而復陳口口以為今日憂建州甚於  
憂寇須寧錦練大師八九萬為要着謂門人曰關門以外

甚可慮也復謝病去弘光初徵為吏部右侍郎

右明史本傳作左

進禮部尚書陞見痛哭曰願陛下無忘高皇帝陵寢出徒步往哭孝陵聲動行路知事不可為自請祭禹陵而私製縞衣刺大明孤臣黃道周七字於其上曰江南必敗以此識我屍也未幾南都果失襄皇帝立訪耆於張家玉家玉以道周對上曰得此商彝周鼎當為廊廟羽儀乃以武英殿大學士兼吏兵二部尚書召道周密陳鄭芝龍不可恃芝龍固素憾道周益不為用隆武二年春奉命督定虜侯鄭鴻逵師北進道周檄所知數十人與俱遂與鴻逵趨浙開化鴻逵逡巡不即前道周儒憤披褐手持小幟以二十騎為先甫入婺源界憩古廟中敵探騎至遂以二十人去

不知其中有道周也道周曰勿多求所謂黃閣部此是矣

鴻逵懼薙髮棄師遜二十人內有兵部主事趙士超中書

舍人賴繼錦

明史道周傳明紀及明季南略卷十一均作中書賴雍

行人蔡春溶

明史

道周傳及明紀均作蔡紹謹南略作蔡繼謹

通判毛玉潔

明紀作毛潔

咸被執既至

留都洪承疇勸降不答又謹以剃刀滿帽遺之不受絕粒

十四日不死藏絕命詞於衣帶所云防風雖倒猶留一節

以問尼丘是也臨命過西華門

明史本傳及明紀均作東華門

坐不起曰

此與高皇帝相近遂與四人俱畢命三月望日也典史宗

大綬私藏其屍於古廟之夾牆又竊其從人首分瘞木末

山息心亭後長子子中乃得而合葬之年六十二詔贈文

明伯諡曰文忠

明紀作諡忠烈

廕諸子有差在鄉立廟曰報忠在

福州立廟曰閔忠樹中興蓋輔坊

傅冠字玄父號寄卷

南略作號季卷

進賢人刑部尚書炯之孫也

明史本傳刊上有南京二字

天啓二年進士廷試第二授編修崇禎元

年陞侍講學士分較禮闈歷左春坊左中允左諭德六年

陞春坊庶子七年以少詹事主考禮闈尋陞北祭酒九年

教習館員陞禮部右侍郎十年充廷試讀卷官拔劉同升

為第一會閣臣員缺吏部循資列推上特簡為大學士未

幾三疏乞休冠在史館十六年纂修神光兩朝實錄編六

曹章奏又纂修熹廟實錄皆稱旨上厚賚之侍經筵日輪

講九黎亂德篇時相諱之欲改擬以進冠曰上方遜志學

古參稽治忽而顧可諱乎仍執前講上霽諭曰講不避諱

直也如卿冠可為朕鑒矣辦事閤中勤而敏雖丙夜奉上御批拔筆卽對無倦容以故上頗眷之未幾致政歸十七年三月國變為位痛哭復籌恢復之計比江南盡失冠與艾南英等募兵勤王力不能支走入邵武隆武二年二月襄皇帝有敕諭行在內閣等朕今暫躡建寧練軍實圖復江右浙徽正擬先臨邵武親督守戰據報永定一開寇犯近地先差文武大臣督兵勦禦併卽出關恢復武臣欽經欽差國姓成功今再差輔臣傅冠作督師大臣欽定銜曰欽命督師平定江寇恢復南昌專理湖東勦撫事務節制峒兵解散難民賜上方劍便宜行事行在太子太保兵部尚書兼禮部尚書文淵閣大學士差同國姓督領陳燿陳

秀二鎮先平關寇卽復湖東其峒兵張安李春丘華謝朝

恩併聽調制命至冠整師而出抵建昌界餉匱後軍逗留

聞警報潛逃殆盡冠嘆曰事可為哉冠惟死以報國耳秦

寧陷自縊為眾所奪有門人江亨龍者

江明史傳冠傳及明紀均作江南略

此以冠械送敵軍李成棟手為解縛延之上座慰勞之從

容以薙髮請冠大叱之成棟復進曰公髮種種矣與髡無

異但加稍薙卽可飾瞻成棟當委曲為公報耳冠厲聲曰

汝知文文山乎是我師也江右節義之邦但有斷頭宰相

無髡首督師也成棟不敢復言衛至汀州事之惟謹凡飲

食起居必偕焉已而成棟率兵粵行遂以冠屬之李發發

汀州鎮將也亦敬冠一日對奕罷展檄請曰旨臨矣冠欣

然整衣冠南拜復西向拜曰祖父暴骨惟冠之幸其何以對先人於地下乎部卒流涕不忍加刃有李友蘭之僕利其賞乃授刃焉冠大笑立而就害湯氏曰冠於瑤焰方熾時超然自遠不以一字通權貴是以威廟卽位屢進其秩前後枚卜凡六十餘人使盡如冠斯亦可以無長憾也哉何騰蛟字雲從貴州黎平人隆武二年秋八月騰蛟以湖廣總督督師與總兵王永誠鄂國公馬進忠易枝虎起兵保守湖南以規取江右兵號百萬原司馬楊鶚復保常德以應辰沅長寶衡永一帶皆能固守屢敗敵兵未幾敵恭順王孔有德懷順王耿仲明智順王尚可喜與啗喇額真焦奈藍拜率兵攻湖南度岳州騰蛟戰敗率諸鎮將棄長



沙走桂林永國公曹志建棄永州走鎮峽敵至湘潭仲明  
別率兵趨湖西可喜東渡江攻燕子窩我總兵陳士明以  
眾降長沙府屬各縣悉陷可喜還復與有德仲明會湘潭

同入衡州時國公郝永忠

明史騰蛟傳作  
南安侯郝永忠

方欲恢復桂陽

可喜率兵禦之至長沙殺其哨騎乘夜抵桂陽永忠先遯  
被追至羅田龍水遂執我總兵張學禮永忠棄營走道州  
可喜遣騎襲之復走廣西先是時有德仲明各固山兵繇  
寶慶攻武岡至紫陽河與我總兵陳友隆等戰未決趣可  
喜來援可喜自道州會之遂破武岡復進攻沅州走我總  
兵張先璧遂入黎平騰蛟之家殲焉繇永抵全粵西大震  
而湖南悉非我有矣永曆三年正月二日湘潭亦陷騰蛟

死之初騰蛟檄召諸道兵馬齊集湘潭而遣馬進忠等繇益陽抄出長沙下邀截敵舟斷絕水道又招撫逆闖之姪李赤心與其將高必正等歸順錫之侯爵圖功贖罪赤心等遂以大隊至敗敵於荆襄之間時騰蛟威震三楚敵其畏之至長沙終繹攻圍會敵眾大至與戰不克騰蛟遂爾被執詔贈中相王設壇掛帛上杖淚親祭之

揭重熙字祝萬

原注云一作萬年

進賢水崇禎十年以五經應試

成進士知福寧州十七年三月京師陷重熙請於當事募海濱死士數千人率之以赴國難會思宗立報罷尋以吏部主事召是冬丁外艱返里門撫州建昌連失與吏部主事曾亨應先後起兵皆一戰而死重熙間道入福州召對

稱旨陞本部考功司員外兵科給事中出辦湖東兵事隆

武二年江撫劉廣胤督兵援贛陷於陣廷推新撫閣臣曾

櫻疏薦重熙以都察院僉都御史巡撫江西上可其奏假

以便宜行事秋七月重熙整兵趨撫州不克已聞福州不

守乃解去潛匿山中永曆二年戊子口月

明紀作正月

金聲桓

反正遣人招之以閩事相屬重熙已被新命晉兵部尚書

不忍却倉卒召募得萬餘眾入關時敵於邵武宿重兵以

逸待勞重熙揮兵進薄城下城中出騎環擊遂為所敗已

而南昌圍急重熙從間道走肇慶請濟師廷議留之內樞

重熙不可遂仍以閣部督師至則南昌已失惟張自盛走

保閩界有眾數萬重熙乃入自盛軍中約廣信曹大鎬特

角並進而自往策應四年冬自盛戰於邵武被執重熙又  
依大鎬軍五年五月率數十人至百丈礫會師適大鎬還  
師鉛山惟空營在有董世滿張馨者以數騎至見重熙驟  
射之矢貫頸二寸許大呼曰我揭祝萬也遂擁去至崇安  
關敵守將曹天壽郊迎至營重熙倨待之時不食已七日  
矣天壽懼其死也曲誑之稍入勺水敵知縣殷應寅來謁  
以時勢諷重熙重熙裂眦責之曰小子亦讀書乃不識綱  
常名教耶越旬以重熙至建寧府百計求死每晨整衣冠  
北拜曰孤臣揭重熙以何日死乎敵撫張學聖至重熙罵  
之遂被害臨命北拜呼高皇帝路坐受刃

陳瑾字白嶽南寧籍湖州人崇禎三年舉於鄉繇知縣起

家永曆五年奉命以兵部尚書督師與趙卬選胡一清二帥守崑崙關敵至二帥戰不利瑾痛責之一清拊膺痛哭慚恨不能言敵鋒銳甚二帥請暫移賓州為後圖瑾不許二帥退守五十里以待數遣騎要之瑾曰喪師辱國失守巖關我為督師罪當死不敢與若輩為逋逃臣也抽刀自剄不殊一清大驚單騎往視以藥綫縫其喉經二日乃甦輿至南寧見上頓首謝罪上輟食溫旨慰之賜以良藥比創愈命往聯絡二十四土司兵馬瑾力疾就道至土司與諸酋歡飲激以忠義事未集敵兵又至上倉卒潛幸貴州瑾追駕弗及乃遯跡遷隆十萬山中以論語孝經授童子問一字輒持一錢人重其清苦十年西寧王李定國兵敗

於新會還經遷隆招之出見瑾長揖不拜定國怒瑾曰大明會典大臣無拜二字王之禮定國謝過請為監軍瑾曰我不能再辱窮餓益甚十一年秋病死上以敕召之已無及矣廣國公賀九義為請卹典命未下瑾為人方正高潔慷慨持大義數折孫可望逆謀欲殺之不果其全髮山中病死非殉難也然曾自刎以激二帥其不死者一髮耳故亦成仁之一也

皇明四朝成仁錄卷十

屈大均原著

葉恭綽校訂

順德起義臣傳

順德起義臣曰陳邦彥從之者曰馬應房

房明史邦彥傳及明紀均

作方曰楊景曄

鄒崇曄番禺縣志作曄

曰高為礪曰楊可觀曰霍師

連曰白嘗燦

嘗明史本傳及明紀均作常

曰朱學熙曰關鍾喜曰霍

達芳

鄒崇達翁山撰陳巖野先生哀辭作懿

曰花巡簡曰僧忠顯

陳邦彥字會份

鄒崇明史本傳南疆逸史均作字令斌陳恭尹所撰先府君行狀及翁山所撰先師

哀辭

同此順德人所居錦巖學者稱巖野先生每歲及門恒數

百人性喜任事識見通敏穿穴古今每郡邑有大議

議鄒本作

謀  
當事必造請諮斷而行國變走南都上中興政要三十

二策不報襄皇帝立大學士蘇觀生疏薦並進邦彥所上

書上嘉歎授監紀推官尋舉隆武元年鄉試二年陞兵部

職方司主事奉命監狼粵兵

明史本傳作  
監廣西狼兵

出庾關贛州圍

急觀生督師往援駐南安數月邦彥數為畫策不聽請偏

師獨戰不許鬱鬱久之贛陷車駕至上杭軍潰觀生聞變

還廣州曰國未有主邦彥曰國亂先內國危先外今東喪

三閩西絕湖湘北淪章貢國家分土十五獨兩粵存耳掃

境內以屬閣下及其危而棄之謂天下何曰然則奈何曰

敵今全力在閩勢且西侵

西歸本  
作南

閣下南歸毋駐而以重

兵東走惠潮因漳泉未潰以控扼之猶可自立若必以擁



立為功謀議之間動淹時日

日原作月據鄒本改

則敵越韓江之險

難與守矣兩粵存亡繫於東向遲則亡速則存夫亦憂疆

圉之不固何患無主北門之事請留一軍以委邦彥不聽

遂與俱還九月永明王監國乃遣邦彥奉箋勸進且請迴

鑿既行襄皇帝弟唐王至廣州觀生擁而立之改元紹武

邦彥不知也西至梧上啓方候令旨夜分召對王御龍舟

太妃垂簾

鄒案妃明史本傳及陳公行狀作后

平粵伯丁魁楚侍王曰聞唐

王得至廣州甚喜然孤既監國矣輔臣蘇先生既具啓入

朝矣彼胡為者邦彥對曰此或仍閩中之舊稱而小民傳

訛乎魁楚曰已即真矣王曰今非戰則和二者安出邦彥

對曰我弱彼強以戰則非敵我直彼曲以和則非名

鄒案非名

南疆逸史  
作無名

當今之計獨宜速返肇慶

獨解本  
作惟

正大位以屬

人心繕兵固險以觀其變耳王曰善明日擢兵科給事中  
奉敕宣諭時十一月九日也十八日王即真肇慶詔以明  
年丁亥為永曆元年邦彥東還未至觀生奏以為刑科都  
給事中邦彥弗入乃使其副職方主事劉大壯奉敕而遺  
書曉譬觀生觀生不聽十二月敵將李成棟佟養甲果自  
閩攻潮惠克之輕騎襲陷廣州唐王被執觀生自經死元  
年正月上在柳州成棟盡銳西寇破肇慶直犯桂林邦彥  
既受團練之詔走甘竹灘說大盜余龍等烏崇余羊城  
古鈔作余使  
乘廣州空虛襲之二月龍率舟數百舟下解本  
有師字入自虎門  
遇敵戰艦百餘艘焚之殲其水兵遂進攻廣州四日不能

下引還成棟聞報解桂林之圍而東桂林繇是得完三宮  
賴以無恐義師牽制之力也於是邦彥起兵高明山中使  
生員馬應房以舟師先攻順德約大學士陳子壯起南海  
侍郎張家玉起東莞參政黃公輔起新會互為犄角四月  
邦彥出攻高明圍之御史麥而炫主事區懷足舉人譚相  
國等皆毀家以從軍聲大振養甲使騎捕邦彥家獲一妾  
二子而以書招之邦彥不從乃殺其二子七月將攻廣州  
先約衛指揮楊可觀楊景暉為內應而說花山盜三千人  
偽降得守東門於是與子壯會師九江約從徑道攻廣州  
西南而邦彥從海道攻其東且邀成棟歸路期以七日薄  
城城中人三鼓皆發約既定邦彥引舟而東子壯忽以五

日薄城一鼓奪西郭礮臺

郭南海起義大臣傳作郭

火器礮發焚一角

樓敵大懼嚴捕細作而內應謀泄景暉可觀並被執死成

棟方戰家玉於新安得報遽返邦彥先報子壯曰今夕成

棟至必遭吾火懼其餘舟奔突請嚴陣待之青旗而朱苻

者我師也報至子壯不即傳令七日昧爽成棟至昂珠火

舟發

火駟本  
作大

邦彥引軍旁擊焚其鬪艦數十斬首千餘擒

孟輝張一鴻楊聰等成棟走邦彥乘風追之平明迫子壯

軍

迫駟本  
作薄

子壯軍不知望帆檣蔽空而上以為盡敵也陣

動成棟因擊之遂潰邦彥亦退攻三水復之斬其知縣陳

億戰於胥江勝之戰於新會又勝之分師高明而炫等接

應復之降其知縣徐嘉植

南海起義大臣傳作  
殺敵知縣徐中玄

斬首五百

分指揮白嘗燦等攻清遠復之斬其副使于華玉知縣張

兆斗駢案南疆逸史敵攻清遠邦彥往救嬰城固守被圍

十日敵為地道達城火發城崩邦彥率死士巷戰項被三

及走待詔朱學熙園中學熙先自經死邦彥題詩於壁曰

戀闕孤懷盡懸絲一命微負傷如未覺無淚不須揮魚吮

艱貞血水為賻襖衣祇應魂氣在氣駢本長繞玉階飛題

畢赴池騎引之而出邦彥笑曰我陳兵科也至廣州不屈

問何言自狀生平一紙及題壁三詩而已入獄五日不食

賦詩自若臨磔作歌磔駢本有天造兮多艱時哉不我與

我后兮何之我躬兮獨苦之語西向受刃顏色不變年四

十有五九月二十八日也駢案粵游見聞錄自邦彥死義

皇明四朝成仁錄 卷十 三五八 廣東叢書

兵始衰敵得以全力直向子壯家玉二軍後十二日

鄒案南疆

逸史作邦彥死後六日增城之戰而家玉死越一月高明之戰而子

壯亦死矣鄒案勝朝粵東遺民錄附錄陳文忠公行狀載子壯死於十一月初六日初邦彥兵

起作書與家玉曰成不成天也敵不敵勢也姑置勿計方

今天步艱難王師風鶴若得牽制突騎使數月毋西則尋

梧必有備是我致力於東而收功於西也其志如此明年

成棟歸正邦彥長子恭尹伏闕請卹詔視子壯家玉例贈

兵部尚書廕恭尹錦衣衛指揮僉事世襲賜祭葬特祠方

議諡以廣州再陷而寢明史本傳作永明王贈邦彥兵部尚書諡忠愍蔭子錦衣指揮邦

彥博極群書著有雪聲堂集南上草其留丹錄則軍中所

作詞旨哀痛尤足愴人

馬應房字子龍順德人父羲祥

鄒案義南疆  
逸史作義

鶴慶知府應

房當廣州陷時為文以告孔子將歸死學宮其友止之義

師起為邦彥往說海寇余龍龍喜率眾攻廣州頗有斬獲

據揚帆退曰

退鄒本  
作還

堅城無內應不可拔也至虎頭門遇

敵舟數百艘焚之斬首千餘轉攻順德成棟卒至與戰龍

大敗或勸應房亡曰我有母遂就執敵知縣詰之曰若父

為太守若為諸生何故作賊厲聲曰父為太守子為諸生

世受國恩是以舉義何名賊為曰若舉義何與群盜為伍

曰書生空拳非藉彼輩則事不集況文丞相招合洞蠻岳

武穆指麾么率可謂非義師乎死耳汝何多言遂沉之伏

波橋下

楊景曄字景生廣州後衛指揮僉事

歸案番禺縣志作三科後衛指揮使性

豪邁才氣不羈以善騎射中崇禎十五年武舉義兵起景曄與楊可觀並約為廣州內應事洩養甲執其母景曄出曰我實為之事不成天也不可上累吾母養甲曰姑釋汝母曰景曄須臾人耳執事既念其母何不及其未死並十齡之妹釋之以瞑吾目養甲並釋之又為好語欲其降其降之解本作景曄曰汝若生我我不生汝也養甲怒使殺之事聞贈都督賜祭葬

高為礪字啓之廣州左衛指揮中三科武舉永曆元年謁行在授都督僉事邦彥起兵為礪及廣州前衛指揮使張象賢俱為內應謀洩象賢被執痛罵養甲割其口鼻仍罵



與為礮並死之

楊可觀字龍瑞廣州東營韃指揮使

鄔案番禺縣志作前衛都指揮使

隆

武二年走天興上書授柳慶副將以歸義師起可觀陰結壯士分置廣州諸門將斬關以迎會養甲重購諸大姓與城外耳目者可觀家奴利購金乃具首內應事養甲親可觀使引餘人可觀慷慨大罵被殺搜戮同事數百人衣縫中皆有桂字事聞贈可觀都督賜祭葬

霍師連字連生南海人尚書謚文敏韜之玄孫也隆武初以生員募兵勤王授游擊以功陞副將廣州陷詐降得守三水邦彥兵起師連邀誘敵官數人斬之反戈以應從攻廣州不利退拔三水

拔鄔木作援

大小十餘戰敵畏其鋒

鋒鄔木作

銳

清遠衛指揮白嘗燦

白駒本作使

舉城迎之師連與邦彥往

赴列柵江上為堅守計騎至不得戰北風大作師連出不  
意疾以火舟出擊成棟佯退師連揮舟追之數里風反退  
迫柵不得入舟盡焚師連將走四會甲重溺水死贈都督  
同知賜祭葬廕子千戶

白嘗燦字燦玉清遠人清遠衛指揮僉事邦彥攻廣州不  
克退取三水扼胥江鏖戰兩日嘗燦乘間與朱學熙殺敵  
知縣舉城迎之分門堅守被攻十日火發城崩嘗燦巷戰  
死之

朱學熙字叔子一字維四清遠人永曆初以諸生上書授  
翰林院待詔城陷自經

關鍾喜字岳孫南海人天啓七年舉人邦彥復清遠使署  
縣事城陷戰死

霍達芳字誠懿

鄒案遺民錄  
作字懿誠

南海人以諸生從陳邦彥起

兵為中軍成棟反正後赴行在授兵部司務廣州再陷走

文村下川與虎賁將軍王興凌海將軍陳奇策相結

鄒案  
奇行

在陽秋  
作其

二將軍分舟師數百使為游兵舟輕士銳出沒海

中每多戰績被執時鞠之不語姓名以家有老母也問曰

降乎三搖其首遂遇害

花巡簡氏里未詳廣州初陷署黃鼎司巡簡邦彥起兵花  
巡簡招結土豪從之事敗俱死邦彥贈以詩曰既有明兵  
料亦有清巡簡一索繫兩賢同舟負刑版是也

僧忠顯順德人亦從邦彥起兵身被數創清遠之陷戰而

死

死下鄔本有亦公之舊門人云八字

屈大均曰自巖野陳公與文忠文烈三路連兵勢同鼎足於是廣之忠臣從之而起者人人破產在在揚戈以與敵人爭一旦之死命蓋從文忠而死者三十餘人從文烈而死者六十餘人從公而死者則此十有一人皆大節皎然有當於從容慷慨之二道者也十有一人者其四為公之門人若應房景擘師達達芳是也而忠顯亦公之舊門人云昔茂名陳思賢遭遜國之變率其弟子六人同縊於明倫堂以死蓋君臣之義盡繇於師弟之義盡師弟之義盡斯君臣之義無不盡前有茂名陳公後有順德陳公時異

而道同也且公之於陳文忠與文烈之於林公游亦皆師  
弟子也道義相孚聲氣相感又復如此求吾粵君臣之義  
者求之師弟之間而可矣大均向受業於公向歸本後死  
之責未知能無愧於四君與否噫嘻今亦老矣嘗為哀辭  
一篇以弔公比於宋王之招魂蓋亦弟子之誼云



東莞起義大臣傳

東莞起義大臣曰張家玉從之者曰陳文豹曰韓如琰

鄒案明史張家玉傳及所知錄均作韓如璜南疆逸史

作如炎勝朝粵東遺民錄考定之云張家玉名山集屈

大均撰張文烈行狀張兆龍李貞上桂王請郵疏均只

有如琰無如璜博羅舊志稱如璜字姬命天啓甲子舉

人弟如琰丁亥殉難又吳次尾樓山堂集有哭韓姬命

如璜詩編年乙亥則其歿在崇禎八年明史及所知錄

皆誤曰林洵曰張恂曰安弘猷等

張家玉字玄子別號芷園東莞人東明聞見錄作新會人

明季南略卷十二作番

禺人明史本傳及結埼亭集外編卷二崇禎十六年進士

十九跋明崇禎十六年進士錄同此

選庶吉士明年三月京師陷家玉數賊李自成十罪被擿

於五鳳樓前垂死偽軍師半金星遣人說降弗動乘賊東

出關鄒本作及脫歸思宗立以六等定從賊諸臣罪賊鄒

賊出東關

皇明四朝成仁錄 卷十 三六三 廣東叢書

逆時阮大鍼欲報私讐謂致先皇帝殉社稷者東林諸臣  
也不盡殺東林諸臣不足以謝先皇帝因誣家玉嘗請自  
成厚葬周鳳翔倪元璐而薦劉宗周黃道周於自成為東  
林邪黨刑部尚書解學龍因以家玉列於第五等會有為  
力辯者得復原官南都陷走嘉興府與副使蘇觀生總兵  
鄭鴻逵等擁戴唐王奉王入福州以乙酉閏六月卽位改  
為隆武元年卽弘光之元年也是為紹宗襄皇帝於是家  
玉大告於諸將曰昔漢光武起南陽以高祖九世孫為長  
沙定王後建元乙酉卽位六月其兄伯升兼有朱鮪李軼  
之難今皇上亦起南陽亦傳九世

鄒崇勝朝粵東遺民錄  
此下有亦為定王後五

字亦建元乙酉卽位六月而且兄弟之難父子之難常變



又相準也揆之天命如此度之人事如彼彼本天與人

歸是真中興之主矣吾等當竭忠事之諸將皆以為然論

定策功晉家玉侍講兼編修旋以大學士黃道周薦命掌

起居注七月六日上大誓文武授鉞分征命定虜侯鄭鴻

逵出仙霞關關本永勝伯鄭彩出杉關總兵施福出崇

安關黃鳴俊鳴本郭煒煒本出分水關黃斌斌督水

師繇海道以抵溫台靖虜伯方國安率師援浙而平虜侯

鄭芝龍督禁兵居守家玉條陳恢復大計請劾戎行上喜

命以翰林院侍講兼兵科給事中監御左營軍左本右本

疆逸史作監永聯絡直浙勦撫江西賜銀印御節使宜行

事與鄭彩督兵進取家玉被命先出關至廣信以待十一

皇明四朝成仁錄 卷十 三六四 廣東叢書

月撫州圍急家玉約諸鎮會兵許濬力戰頗有斬獲都督

陳有功參將葉壽陣亡家玉乃出金帛築壇選驍悍郭毓

卿李忠明解本作李明忠陳良趙珩四人拜之令各領死士分伏

伏已拔營佯走敵以萬人追擊伏發斷為二斷下解本破有敵字

之遣書潛入撫州約永寧王兵襲敵內外夾擊翌日又破

之於千金陂陂解本作坡撫州圍解捷聞上優詔褒獎懸進賢

伯世爵以待方是時鄭彩以兵三千守關內家玉以兵三

千戰關外使乘敵大創創下解本有後字並力而前可以得志而

彩惟怯不從二年正月彩盡撤兵入關棄新城不守家玉

謂新城者永定屏障永定者福京門戶城雖褊小不可棄

請留一鎮亦不從家玉乃與新城知縣李翔募兵以守事

未集敵騎突至麀戰城南中矢墜馬上聞謂統兵大將盡走入關獨使文臣陷陣何以自解詔讓彩而慰家玉曰爾許灣之戰建撫以復新城之守杉關以寧威著華戎忠格

天地今者箭瘡勿藥宗社賴之特晉爾僉都御史

明史本傳作右

僉都御史

巡撫廣信仍准帶翰林舊銜家玉以無功辭不拜請

給假三月往惠潮二州措餉招兵為進取江西計上許之

賜營名武興家玉為監督總理

督驛本

八月至鎮平單騎

入山諭劇寇黃海如降得數萬人又招寇黃元吉及其三

十六渠得萬五千人旋叛去購其黨斬之於桃陂而潮惠

寇悉平簡精銳萬人分為五營餘悉散遣九月車駕至上

杭御營潰散家玉方引兵出營迎

鄔本無營字

卒遇敵於赤山

坂坂鄒本作坡鄒貝勒遣使招降貝勒鄒本眾起剛之眾

剛案遺民錄作剛之鳥本作眾怒將來使剛之剛碎其檄邀擊甲騎山谷中敗之家玉還駐

鎮平願士卒皆盜賊之餘糧盡終無固志軍竟散散鄒本

會有大父之喪遂歸是冬十月上監國梧州大學士蘇觀

生復擁立唐王於廣州以兵禮二部右侍郎召家玉不赴

廣州既陷佟養甲遣使說降復致書劫之答曰大丈夫得志

丈上鄒本則立事功失志則存名節我京師罵賊思文皇

帝嘉之寵我如子我受聖明恩重下髮背之下髮鄒本

心弗忍今若拔我一莖雖易以單于弗屑也永曆元年三

月遂起兵鄒案三月風倒梧桐初至到潞鄒案到潞所知

得驍銳千人鄒本作得驍主事韓如琰主事明史家參將

鄒本玉傳作舉人

李萬榮鄔案遺民錄

作李乙木

各率眾來助遂復東莞斬敵知縣鄭

塗鄔案南疆逸史作鄭瞻

典史趙元鼎以狗以原訓導張珪知縣事

原副使張恂指揮僉事安弘猷城守還軍到浚再治兵將

向廣州邑人原尚書李覺斯主事李夢日總兵王應萃等

鄔案遺民錄

請敵來攻家玉還軍金鰲洲與李成棟接戰

不利東莞再陷珪弘猷戰死恂自剄於是成棟往攻望牛

整破之兩攻到浚

兩字原缺鄔本據遺民錄補今從之

血戰三日破之我守

備葉品題何勉葉時春盧學德千總何士登

鄔案遺民錄附錄屈大均

撰張文烈行狀作何仕登

皆戰死家玉祖母陳母黎赴水死

明史本傳云祖母陳

母黎妹石寶

妻彭罵敵斬肢體死

斬鄔本作斷

家玉走西鄉依

陳文豹承制授文豹總兵委以召募旬日義旗復振

振鄔本作

整出復新安斬獲甲騎三百餘步兵千餘遣兵徑襲東莞

徑解本未至敵知縣逆戰於白沙原參議鄭瑜使其眾助

敵我師勝之斬首數百擒叛推官尹希臨覺斯之壻為敵

先導者也再攻東莞不克成棟復至攻西鄉家玉誘之入

砦殲數百人血戰二日舟師先敗文豹及監紀推官王者

肱監紀通判李乙木都司陳蘭穀守備葉如日葉進之葉

文明胡起新生員曾盧桐等皆戰死西鄉被屠蓋敵三攻

西鄉而兩敗兩攻到濠而一敗死傷萬餘咸咋指以為勁

敵云家玉走至鐵岡得姚金之眾千人陳穀子之眾千人

象案穀子南疆至十五嶺得羅同天劉龍李啓新之眾三

逸史作穀之千人軍聲復振遣攻龍門斬敵知縣林之秀教諭藍奮興

鄒案遺民錄無奮字

典史汪熊巡簡稽高兵四百餘級七月親攻博

羅復之斬敵城守朱振邦兵五百餘級以李顯謨為知縣

廖習梧為教諭分兵復連平州斬首百餘隨下長寧斬敵

知縣顧濟德兵四百餘攻惠州三日不克克歸善縣守備

陳瑞昌戰死乃還博羅敵攻之五十餘日

鄒案張文烈行狀作二十日

從葫蘆嶺穴地發火城陷習梧冠帶緋衣代家玉巡行樓

堞被射以死城遂屠顯謨及守備劉麗敬千總葉奇才葉

文揚戰死家玉返龍門召募復得兵三萬

鄒案張文烈行狀作四萬明史

本傳作萬餘南疆逸史作萬人

遂向增城家玉營城南諸將營西北凡三

戰斬首一千九百餘得馬四百九十敵大至燒一小營西

北諸軍望而陣動敵遂突犯中軍血戰竟日敵據平岡少

休軍法出張旗入卷旗得敵旗則麾旗而呼以入

則字原缺據鄒

本補有大旗總方奮前陷陣得敵旗喜而忘卷張旗入中軍

効功西北諸營望見敵旗以為敵已入中軍皆走保壘前

軍見後軍走亦皆驚亂自衝西北二營以潰成棟率鐵騎

蹂之我軍死者六千餘家玉項中三矢

鄒案南疆逸史及遺民錄均作九矢

傷一目赴野塘死十月初十日也

十月原作十一月鄒本據張文烈行狀行在陽

秋及遺民錄敵得其屍佩銀印文曰光明正大

鄒本作正大光明

襄皇帝所賜者也家玉既死諸文武將吏死亦略盡其可

知者增城之戰則總兵黎昭傳盛羅同天副將陳奇棟

奇鄒

本作楊威雄參將李輔明守備丁善和葉秀芳黃鎮朝李

嘉伍千總梁實興徐大佐等同家玉而死者也從弟都司



有光亦被執不屈死萬家祖之戰鄒案祖翁山則從弟有

恒貢生尹鉞鄒案南疆逸史作伊鉞望牛塾之戰鄒案望牛塾原作牧牛坑據遺民錄

改則參將楊邦達北柵之戰則推官陳伯耀潘汝隆赤岡

之戰則主事鄧棟材參將王贊廷廷鄒木作庭陳子英龍門之

戰則武舉譚高謀永安知縣譚高擢博羅之戰則守備方

如璇鄒案遺民錄守上有主事韓如琰五字千戶侯成祖游擊譚立志等鄒案

名山集及遺民錄均作譚立志又譚立志之下有生員韓二見五字先家玉而死者也瑒字

台玉大埔人鄒案嘉應州志及遺民錄均作程鄉人貢生習梧字完楚貢生

昭江西人盛歸善人同天龍門人奇棟從化人皆家玉之

愛將明年三月成棟反正思恩侯陳邦傳首上章請卹上

揮涕輟朝一日詔贈家玉少保兼太子太保家玉二字原缺據鄒本補

武英殿大學士吏部尚書增城侯諡文烈賜祭葬建祠廕  
一子錦衣衛指揮使世襲一子中書科中書舍人父兆龍  
陸見上慰勞備至封增城侯家玉死年三十三論者以家  
玉受知於襄皇帝最深所以報之者可謂無愧初襄皇帝  
嘗語家玉云朕痛憤國讐枕席間嘗有淚痕今者車駕親  
征身等鴻毛為二祖列宗為歸本作必欲救此瘡痍百姓有進以  
死無退以生艱難險阻惟卿與共之嗚呼至是而襄皇帝  
知人之明為不負矣至於提烏合之眾水步連攻家自為  
軍人自為鬪使敵人驚服首尾狼顧喋血千里救死不贖  
而筦管之三宮得以無慮則家玉之大有功於中興也家  
玉高才博洽下筆千言在天興凡誥敕高文冊典多出其

手在軍則有言兵事薦賢守疆諸疏其軍中遺稿讀史詩

諸作曾呈御覽曾原作書最行於世於字原缺

陳文豹字孺赤鄆宗孺新安縣志新安人少負才武尚節

義兩京連陷連鄆本文豹於所居西鄉團練千人自保諸

寇環視不敢犯廣州陷敵知縣至新安厚飲於民民不堪

命文豹代輸金數千尚無厭眾怒遂奉文豹舉義斬之以

狗諸生王者眩出貲巨萬助軍軍大振李成棟遣兵猝至

與戰敗之其將殲焉會張家玉至招黃麻園義旅為助諸

山驍武戈矛競起事未集成棟復攻之復下鄆本觸伏發

地雷火器鄆本作伏發死者無算遣漁者數百人邀截虎

門燔其樓船至盡越數日復來攻鏖戰三日軍士死傷者

眾不能支文豹躍馬入陣格殺數十人以死

鄒案新安縣志作戰於赤

岡山下

者肱授監紀推官

者上鄒本有王字

時亦戰死妻子俱自

燔死西鄉屠焉男女數萬無一降者文豹故饒於財平時

喜周人急故鹽徒蛋戶一呼響應兒時隨母避賊母置文

豹草中賊數人捉之弗動及其耳而去鄉人因以為神至

是舉兵昏踴躍曰我公天佑事聞文豹贈都督賜祭葬先

是新安治東二十里

治鄒本作城

有白石村居人二百餘年以

打魚自治廣州陷首起義旗以應家玉斬獲頗多被圍暮

月西鄉陷勢孤舉村戰死其為首者一諸生姓楊云時新

安諸生曾盧桐東莞諸生陳伯耀亦破家同事盧桐戰死

新橋伯耀以監紀推官全髮被殺所居北柵亦以起兵被

屠有王元起者新安諸生投井死

韓如琰字潤季

鄆本州府志潤秀又云博羅人父晟某縣知縣

鄆案惠州府志作遂安知縣

如琰中崇禎十五年舉人

十五原作三鄆本原作五據憲

州府志改今從之

國變將謀起兵先為檄文馳布辭旨激烈當事

疑而執之旋得釋廣州既陷遂偕從子二見

見原本人據鄆本改入

羅浮山招集壯士五千與家玉合軍攻復博羅歸善二縣

未幾博羅再陷如琰督戰不支單騎走園頭鎮其姻家舉

人朱庚龍者

庚鄆本作唐

將執以獻如琰倉卒與二見赴水而

死其子若婦在博羅者十二人是日亦同死其檄有曰誰

無君父詎專責於縉紳孰非子臣豈有辭於草莽又有曰

愴共主之何存惟宜死鬪倘大讐之不報何以生為噫嘻

可以見其志矣事平

平字疑誤

贈兵部職方司郎中賜祭葬

林洵字習修東莞人曾祖烈福建鹽運司同知祖培神宗

時南京河南道監察御史

道字原缺據鄒本補

伉直敢言都人歌之

曰南林北馬臺省增價時臺省以言建儲被斥者三十四

人培具疏申救又力諍四事慎喜怒審好尚辨忠邪節採

織謫福建鹽運司知事卒贈光祿寺卿洵補諸生家玉少

從之學

家上鄒本有張字

嘗問洵他日致君當於古人何若洵謂

吾於漢尚友一人曰甚矣汲黯之戇也於唐尚友一人曰

會須殺此田舍翁家玉既貴薦於朝隆武元年詔以人材

徵家玉奉命返粵募兵詔洵以推官監紀其軍廣州陷東

莞知縣余經國倡議迎降洵庭叱之會家玉以大父喪還

家敵至家玉欲就死存欣然出西監藥杏授之曰子前不  
屈於賊今復不屈於敵可謂完人子死吾將隨子置酒生  
祭之已而陳子壯書至約同舉兵而存為謀主東莞既復  
家玉還軍到浔留存守萬家祖敵至存督鄉兵力戰家玉  
還口戰酣風反我舟被焚遂敗萬家祖屠焉貢生尹鉞存  
弟諸生涯同赴水死家玉轉戰博羅又敗存為文謝世將  
歸死孔廟有舉人黃文燦者燦解本得存所與家玉書使  
之分兵出應王師者以獻於敵敵知縣施景麟執之並以  
存野紀二卷紀解本雜詩一卷辭旨憤激或哭或詈上之  
佟養甲養甲親鞫之存箕坐抗聲不屈獄中聞家玉戰歿  
哭祭之曰吾昔祭子於生今祭子於死吾昔祭子於生吾

惟恐子之不死吾今祭子於死吾惟哀子之不生也臨命

賦詩有四十七年柴市骨英魂長願侍君王之句年四十

七與文丞相同故云事聞贈文林郎

鄒崇名山集遺民錄均作推官

從弟

泗英東莞諸生年十九

鄒案廣州府志作十八

赴天興上書裏皇帝

嘉之授中書舍人唐王之立上方駢蹕梧州泗英上書翼

戴奉旨朕以神宗謫派勉承丕基湖南業已投誠廣省亦

經啓賀乃以航海避難之王突而稱尊朕不敢為祖宗讓

諸省臣民亦不肯為朕讓也據奏忠義凜然即赴行在以

憑優擢旨下廣州已陷家玉兵起泗英號召義旅為反將

李胤香所執未幾子壯師薄廣州泗英從獄中密授軍符

為應將率諸囚決鬪事覺敵就獄殺之



張恂字士和號種穀東莞人永福知縣弘濟之子中萬曆四十年舉人初教諭保昌崇禎四年陞衡州府同知會勦峒源大盜擒其四渠脫難男女萬計請設嘉禾新田二縣為善後計陞永州知府地經川寇破殘請減派黔餉改食東鹽又為修備儲練以禦變亂以故流寇再犯鄭襄而不敢窺永州境土隆武元年遷督師閣部軍前監軍餉道湖廣按察司兵備副使以病歸詔晉太僕寺卿鄒案名山集遺民錄均作光祿寺卿家玉其族孫也東莞既復恂自領一軍比城破戰敗至錢屋田北向拜曰臣力竭矣遂自刎死贈左參政賜祭葬子景萬字福孺詔授監紀推官監連陽軍以復城功陞兵部職方司主事監軍湖南駐藍山時有楚弁曹志建擁

大鎮以叛迫景萬降不屈大書絕命詞伏劍於藍山署中死之

安弘猷字叔壯其先靈壁人以祖圮世襲南海衛指揮使

東莞被攻弘猷血戰南門而死弟弘烈弘謨子正邦正道

皆死死下鄔本其妻妾女亦皆死妾下鄔本詔贈都督賜

祭葬楊邦達龍門人先大戰於分龍嶺斬首千餘又戰於

望牛塹生擒渠率五人率鄔本被流矢死皆家玉之愛將

也此七字原缺譚高謀字天池武庠生譚高擢字景卿貢

士士鄔本俱龍門人高謀前為京營守備家玉兵起高謀

招集義旅為龍門內應被執死之高擢舊知縣清河鄔案

縣志作廣西天河知縣歷罷歸家玉恢復永安使為知縣

署象州知州全州州同

城陷死之有陳婆知陳爰裴鄧棟材者奉家王命起兵於石岡門婆知戰死國子助教陳文者起兵於橋頭與爰裴棟材相應敵攻其所居之鄉曰北柵者文與爰裴棟材皆被執不屈死之

屈大均曰自廣州不守張公首建義旗以為諸豪俊倡於是東莞山圍水砦所在戈甲雲興競為兵首以與敵人決命爭一旦之生死縱橫數百里間小者百人之奮大者萬人之鬪鉦鼓之聲晝夜喧闐不絕而一稟節度於公以為進止嗚呼公何以得此於東莞之人哉計敵自入粵以來所將皆西北遼人其精銳為公所殲髓到澹腦西鄉十而三四存者亦瘡痍之餘雖欲不反正歸誠以十郡還之天

子勢不可得公蓋以敗為成十郡雖不自公恢復而卒使  
惠國乞降行朝再造兩粵得見中興之盛者公之力也公  
敗之於東而成之於西所繇與陳文忠陳巖野諸公同為  
佐命元勳之冠歟

南海起義大臣傳

南海起義大臣曰陳子壯從之者曰朱實達曰黃炁元等其從於高明者曰麥而炫曰譚應龍等子壯起義以南海始以高明終諸臣皆同死事故合為一傳

陳子壯字集生別號秋濤南海人也曾祖紹儒南京工部尚書祖弘乘善化知縣父熙昌吏科都給事贈太常寺卿子壯以萬曆四十七年廷對賜進士第三授編修天啓四年子壯典試浙江得士甚盛逆璫魏忠賢慕其才名營第求署書峻拒不答熙昌為吏科給事中在言路則疏糾忠賢罪狀忠賢既積怒乃諷其黨撫子壯試錄語以為訕於是父子同日敎官威宗立忠賢伏誅起子壯左春坊諭德

而熙昌除吏科都給事會病卒子壯服闋遷中允轉少詹

事陞禮部左侍郎

明史本傳  
作右侍郎

兼侍讀學士克經筵日講官

每進講敷陳灑灑所啓沃上為動容傾聽稱先生而不名

一日御東華門出諸章奏授廷臣令各以其意擬旨越日

以子壯及文震孟張至發姜逢元等九人下吏部錄履歷

以上屬意且大用子壯尋署部事八年寇燬中都祖陵子

壯言今日當以收拾人心為急宜下罪己之詔與天下更

始庶幾激發忠義寇乃可滅上嘉納命列其目子壯具十

一事

明史本傳及舊鈔本陳  
子壯行狀均作十二事

曰蠲租曰清獄曰束兵曰恤

宗曰宥罪曰豁贓曰改折曰寬驛曰省工曰旌敘曰事例

詔行其十惟事例一款格止初紹宗在唐邸嘗以禮節之

失劾州縣官被罰者四人又以文移紊錯劾知府推官等  
而周藩亦劾御史督學並下獄論治子壯慮外藩權勢寔  
重有司不能制下民將受虐無告因具疏論救唐郊聞之  
弗善也為書復往子壯報箋諷以愛民保國尊朝廷崇禮  
法言婉而直其後紹宗卽位更注念召子壯人謂君臣兩  
得之云是時宗室日繁歲祿不繼有詔宗人具文武才者  
藩府以聞許改秩授職子壯疏謂宗藩得應貢舉已有文  
武二科以羅其才今聽上名自列耳目徒寄長史長史考  
察不屬撫按而屬親王必且一意將順將所謂才者未必  
才能者未必能難於核實考驗且館驛之伴送參劾之顧  
瞻考功之連坐多有不便乞罷前議上怒下詔獄將律以

疎祖間親罪且不測中宮聞之惻然告上曰素聞子壯忠

貞陛下方思治奈何殺言事者上意稍解廷臣連章申救

論贖罷歸故事逐臣無疏謝者子壯自以蒙上眷久不忍

草草去國乃陳謝報聞而後行人以為知禮京師陷上殉

社稷安皇帝起為禮部尚書掌詹事府事加太子太保敦

趨上道至則南京不守矣

行狀云乙酉正月赴金陵與馬阮不協五月南京失公經浙還

粵是在南京有五閱月之久與此異

隆武二年

明史本傳作隆武元年

以東閣大學士

禮部尚書召

明史本傳作兵部尚書

以母朱氏病劇疏乞暫留而福

建又陷其冬敵終養甲襲陷廣州子壯以母在城乃薙髮

詐降得奉其母還九江堡永曆元年二月遂與兵科給事

陳邦彥刑部主事朱實蓮長子兵部主事上庸起兵九江



堡遠近聞之翕然響應清遠則指揮白嘗燦舍人朱學熙  
高明則御史麥而炫主事區懷吳廣州則參將楊可觀指  
揮楊景燁皆約以城應而侍郎張家玉起兵東莞參政黃  
公輔起兵新會各殺其令遙相聲援七月五日子壯督舟  
師千餘艘卒至廣州一鼓奪西郭礮臺養甲大駭乘城自  
守趨檄所遣東西兵還救重購諸大姓為義師耳目者手  
刃子壯妹壻知州梁若衡以立威而可觀家奴先首其主  
內應同事悉被捕執是日殺內城豪傑數十百人城中震  
慄趙王與從子亦被絞死子壯本以可觀等內外同謀可  
恃以濟故輕率烏合卒攻圍至是意氣大沮而上庸又  
以憂勞患痢卒於軍眾志益衰望敵舟先自披靡前軍方

戰後軍盡已奔潰莫可如何子壯乃走高要橫桐鄉與而

炫等合八月克復高明殺敵知縣徐中玄教諭曾颺十月

李成棟來攻明史本傳作九月為地道穴城爆火藥破之子壯冠

服端坐自如成棟輿至軍具賓主禮談笑引滿舉止如常

至廣州訶責養甲曰汝世食明衣明明何負於汝而背畔

至此吾國家大臣不為汝屈養甲坐以木案衣以赭衣早

遊四闌大書其旗曰逆宦陳子壯云臨命呼太祖高皇帝

不絕聲遂被磔死同日死者區懷炅生員區宇寧武舉區

銑關倫紀貢生楊從堯楊從先譚熙昌李鍾岳程憲玄曾

一唯僧達朗凡十一人據行狀同日死者尚有知縣曾貫

炫亦同日死季子上圖將同命家僮伯御請代乃囚之時十一

月六日也上聞震悼詔贈子壯中極殿大學士禮兵二部

尚書太師忠烈侯

明史本傳作番昂侯

諡文忠賜立祠祭葬有加上

庸太僕寺少卿廢次子上延尚寶司丞上廢錦衣衛指揮

使加都督同知孫周贊中書舍人上庸字登甫上圖字叔

演廣州再陷上圖舉家匿皂帽山全髮不屈虎賁將軍王

興給其衣食痛憤以死若衡字簡臣南海人崇禎三年舉

人十三年特賜進士知廣西永福縣革搖人例全與兵餉

羨餘

全張本作金

以廉稱靖江王時蓄異志陰與尚鑾相結獲

盜驟使若衡開釋若衡不從又奸徒指良民田以獻王王

遣吏執券索印若衡不可威脅之卒為不動以憂歸遷左

州未赴死難事聞詔贈光祿寺少卿賜祭葬懷昊字熙仲

高明人戶部尚書大倫之子以廢入監授知縣與從子宇  
寧並有戰功宇寧字精卿岳州通判大樞之孫以諸生授  
監軍知府懷炆後贈光祿寺丞銑以舉人授兵科給事嘗  
奏設都含太平巡簡司者奉欽劄陞監軍副使聯絡西師  
後贈光祿寺少卿加增兵部左侍郎廢一子錦衣衛指揮  
僉事從堯字中郎年十五以文學知名工詩賦善書崇禎  
壬午歲貢授知縣從先授學錄熙昌授監紀推官憲玄字  
覺斯以監授戶部主事一唯字貫卿以生員授中書二人  
並高明人破家助兵子壯使試兵部主事

朱實蓮字子潔號微龕南海人祖讓夔州知府實蓮性聰  
穎七歲能屬文總角舉鄉試第三提學魏浣初薦舉授德

清知縣歲飢賑活萬人以漕兌愆期被劾提騎至上官念  
其清廉釀助千緡不受至京降苦江照磨踰月補臨淮知  
縣憂歸隆武元年召刑部主事未行上卽位轉戶部奉敕  
團練水陸義師廣州陷與子壯起兵九江敵盡銳來攻兵  
悉持兵伏隘斬獲千餘馬數百匹生擒敵將數人敵甚患  
之乃率戰艦數百與子壯分攻廣州使陳官棐梁標陸言  
葉以繡先登遂奪西關礮臺會成棟軍還大戰我師潰走  
竇蓮一軍獨完為殿退屯三水而使區懷炅先往高明以  
子壯令呼程憲玄曾一唯等為應高明旣復軍勢復振子  
壯委竇蓮署高明縣事以吳兆健署教諭朱名臣署訓導  
關天鍾梁蓮臣等分門而守竇蓮旣與子壯據高明而九

江以屢勝而驕中無主持內變忽作敵潛入破之屠戮數千人遂攻高明三日城復陷實達手刃數人被磔死兆健名臣蓮臣並死天鍾長軀黑面力舉千鈞巷戰殺數十人而死同日授戶部參謀中軍生員謝過春授監紀推官劉民欽程憲康生員楊如桂譚建新譚萬蘭貢生譚介維嚴必登譚登魁譚象璠曾啓佐譚有珍李宏材譚象璵劉景星楊而楠譚燧譚繼俊楊際昌程憲雍楊應遜楊本立譚可美劉守芳莫可當楊贊之楊夢陽等皆死之據陳子壯行狀與朱實蓮同死者尚有參將麥鐵檣游擊陳冲都司關熊方從灼守備何熙中書范奇徵並義勇軍隊長林挺秀梁應辰趙宛符陳瑞潘文鑑潘至慎他男婦死者三千餘人官隸字保章年二十餘偉幹多武藝與標言以繡皆先登中礮死標言並南

海人以繡建寧人兆健字行之進士羽侯之子以諸生試兵部司務名臣字穀友以諸生授贊畫知縣試兵部司務蓮臣字某順德縣人御史元柱之子以諸生為遊擊子壯其外舅也實蓮有異才辭章秀逸著有詩稿

黃炅元字元晦弟旻元字元容南海人皆名諸生子壯起兵謀先復廣州蠟書使炅元旻元為應並署兵部主事事泄旻元被執並逮其父以致炅元旻元時已逃出乃還詣獄曰吾兄弟思報國耳吾父無與遂駢斬東市旻元就道讓其兄先行曰造次不可失序也時炅元年三十五旻元年二十九弟晟元字元節方捕急脫走藤縣成棟反正晟元率義徒恢復梧州授監軍副使梧州復陷力戰死兄弟

稱三烈士其友郭非亢南海人以諸生從子壯起兵子壯承制授贊畫知縣兵敗後不肯薙髮里人傳天植者捕之非亢曰吾此髮在小人則輕於鴻毛矣吾則不然吾今完而勿損使繫吾頭於市亭而無煩繩組不亦可乎乃自詣天植天植縛而獻之臨命怡然

麥而炫字玄仁一字章閣高明人崇禎四年進士知縣上海多惠政邑中有虎為文告於神虎去作遠虎亭以志之歲以催科不及降福建布政司簡較旋署寧海漳浦二縣攝漳州海防丁艱補安肅旋與權要不合罷歸築康山書院教授上監國起湖廣道監察御史未行值廣州失守數被招復書不屈永曆元年四月陳邦彥起兵將襲高明而



炫約為內應不果八月陳子壯帥師至而炫遂與譚相國  
區銑等說敵知縣徐中玄中玄許之以高明迎子壯又與  
相國關其忠李星一合師出攻新興復之高明再陷而炫  
亟欲還救兵潰將率東山獠狼圖再舉奸人紹而執之至  
廣州不屈與弟而焯及隨征都司嚴曾都司生員謝逵等  
同死詔贈太僕寺正卿賜祭葬廕一子而焯字昌仁以諸  
生從軍授監紀推官從子萬垓字道泰世襲百戶授都司  
先高明城陷巷戰而死先是新興有錦衣衛梁逾字卓甫  
與新興生員梁州垣耆民梁州翰起兵與而炫合戰敗皆  
被執死之二年上命梧州府通判劉姚馨往葬州垣以一  
品禮祭七壇官其子敬承監紀通判逾先有護駕功陞僉

同至是贈廣威將軍

譚應龍字能岳高明人崇禎中為昭平典史知縣嘗委鞠囚既定贖納錢囚泣問之曰鬻女所得也請於知縣以俸代之有勾絕軍丁金却之旋以不忍腹民詣上拂衣歸北都變聞與二子相國正國衰服書大行皇帝血詔於堂日拜而哭謂先皇帝死而不忍忘百姓吾百姓生而忍忘先皇帝乎且自有書契以來帝王之哀痛亦云多矣然未有若先皇帝之慘者也讀之而不以死報先皇帝者其人必不忠讀之而不以死報先皇帝者其人必不孝汝曹勉之隆武二年廣東陷舉家全髮陳邦彥過之嘉其義言於子壯子壯帥師將至應龍使相國出迎而陰約而炫與為特

角半旬而高明克復應龍之力居為多力字原缺子壯承

據鄒本補

安眾志更移妻子入城同署縣朱實達力守常佩一帶謂

子姪曰脫有不虞吾當雉經於母塋之樹矣比城再陷乃

謂其妾黃氏曰汝嘗誦唐人波濤誓不起妾心井中水之

句今其時矣妾欣然赴井應龍徐整衣冠自縊年六十有

九相國妻口氏抱幼子憲默亦赴井事聞上以應龍一門

節烈准照以死勤事例給祭葬建祠旌表相國字起臣崇

禎十二年舉人國變後為書將獻行在以不能具行李而

止當事檄餉鬻產得三十金首輸之曰吾以輸義上即位

授禮部儀制司主事元年春聯集義旅從邦彥襲高明弟

皇明四朝成仁錄

卷十

克既與區銑關倫紀等說敵知縣徐中玄中玄說遂舉城  
降二年春走南寧迎駕中途為土寇所害年四十九詔贈  
員外郎

屈大均曰吾廣州故有三大忠焉其與國為存亡與君為  
生死仁之至義之盡蓋文陸張三公其人也嗟乎廣州故  
忠臣之淵藪哉宋亡於廣州三公死以終之明興於廣州  
三公死以始之事雖不成而已有牽制之功臣沒於東而  
君存於西矣故永曆之初言中興大烈者吾必以陳公為  
冠其從之者皆非常之士云

定安死事傳

定安死事曰吳履泰曰王昌言

鄒案言翁山文外王惠愍先生哀辭作元

吳履泰字亨若定安諸生永曆元年四月清兵南渡瓊海  
闔郡官吏皆薙髮迎降履泰時丁父艱乃以衰經起兵盡  
散家貲召募旬日間得壯勇三千黎岐之眾六千於五月

五日

鄒案定安縣志作初十日

慟哭文廟大誓師分水陸二道進擊十

一日

鄒本作十二日

戰於買萬長坡

鄒案坡翁山文外吳端烈先生哀辭作陂

斬獲首

級以千計清兵稍却次日黎明以鐵騎夾擊我軍遂潰履  
泰謂其弟履節曰吾力盡矣事之不成天也汝可歸葬先  
人毋使暴露大呼崇禎先皇帝數聲抱石投海而死其甥  
王蔚文從之於是門生故舊為履泰設位而哭私諡曰端

烈先生予為辭以哀之辭曰有美人兮何豪雄衣斬衰兮

為元戎父死謂何兮有他志吾志未卒兮辭殯宮

鄒案吾志未卒

翁山文外

將破羌兮瓊海外出奇句兮水火中募黎迤兮

半萬襍生熟兮蠻童果下駟兮爭跳蕩骨為鏃兮藤為弓

血濡縷兮

鄒案翁山文外此下有躍穀藥弩兮成叢棉木槍兮三丈進退運兮如風蒼頭色兮二十四

字

黎錦香皮甲兮重重百子礮兮鹿鐵洞人馬兮心胸慶

戰兮大捷血十里兮沙紅天不助兮義旅再鼓行兮摧鋒

如流星兮突騎貫我陣兮西東鳥獸散兮驚駭羌半化兮

沙蟲沈那黃兮抱石與相累兮相從魂魄毅兮長在何草

莽兮孤忠無一命兮爵祿為國殤兮以終展我甥兮壯士

於魚腹兮依公驂兩螭兮滕鯀子前海若兮後祝融哀陸

沉兮赤縣挽潮汐兮洗炎邦鄒案邦原作邪嗟後死兮無

力鄒案兮原作者據翁山文外改徒望之兮鬼雄投大招兮水怪為我致

兮蛟龍

王昌言字如綸定安人諸生南京吏部尚書弘誨之孫鄒案

吏翁山文思明知府鄒案明定安汝鯤之子鄒案汝鯤原

外作禮縣志翁山文外勝永曆三年六月五指山黎有叛酋馬蹬

根者結黨林冲霄黃敬純謀破定安擁上流以窺瓊郡昌

言所居龍梅實當黎賊出沒之衝念龍梅不守則定安一

邑隨之而陷乃散家財糾壯健為捍禦計賊知有備不敢

越龍梅咫尺犯我邊陲先是崇禎十七年昌言已設備至

是賊乘昌言稍瑕以數萬眾出攻昌言率死士先登陷陣

多所斬獲既而參將張某軍行過伏棄戈潰敗

敗歸本昌

言單騎衝突手刃數人毒矢雨發不能支遂死妻陳氏被

執以計脫其孤懋曾乃罵賊而死是秋九月定安陷嗚呼

昌言守龍梅而定安以固延至六年不被寇人倚以為長

城地特以為磐石昌言死而定安遂失禍流數縣生靈數

十萬無所寄其須臾之命焉天之欲亡昌言也夫豈惟一

身一家之故而已哉夫當黎賊作難可以挾妻孥負圖史

飄然遠逝矣乃義不返顧與城存亡遂與吳履泰為定安

二烈視彼州縣大夫有官守者委百里之命而不恤相去

一何懸絕哉定安人私謚昌言惠愍

歸崇惠遺民錄作忠

以其嘗置

義田設義學賑飢恤貧造橋梁治道路有德於鄉又能保



障一城屹為巨鎮以一死殉其父兄子弟予又為辭以哀  
之辭曰嗚呼定安迺有二仁吳之與王忠義其振端烈惠  
愍社稷烈臣身沉海水血灑戰塵惠愍之死夫人同淪蛾

眉罵賊亦動星辰脫孤於死勇計如神

解案勇翁山  
文外作智

尚書

弗絕亂子酸辛一鄉一井一郡本根王之水土小大惟均

守死勿去以保城闈為士如此為臣必純屹然大節朱崖

垂芬嗚呼吾廣東有三大患一曰交趾一曰澳門一曰黎

昔湛文簡有恢復交趾之議龐惠敏蠔鏡有陳可虞之疏

鄭崇蠔鏡有翁山  
文外作有蠔鏡

海忠介有滅黎之疏載在志書一一可

考然三大患黎尤近蓋黎居五指之山為瓊三州七縣之  
心腹孰黎奸宄往往勾引生黎肆其抄掠思得三州七縣

而甘心焉蓋未嘗須臾而忘瓊也昌言軍殲身死瓊之人至今憤恨此事勢之最烈者當事大夫苟能以忠介之疏奏聞於朝依所區畫而行諸岫既平分為數縣黎母之子孫鏤頰雕題與乾脚生歧之眾悉為化內編氓沐詩書而知禮義是猶反掌之易易焉耳奈何其不講此策也

屈大均曰當宋之末瓊有謝明謝富再安國黃之傑者從安撫趙與路

鄒案路瓊山縣志作路

拒元兵於白沙口事敗被擒皆

慷慨不屈以死於是瓊人義之終元之世瓊州無登進士者明興人才大起丘文莊海忠介以文章道德嘉謨嘉猷鬱為名卿大夫冠當成化二年秋薛公遠進戶部尚書邢公宥進都御史而文莊進翰林學士皆在一月之內雖天

下望郡亦罕有衣冠勝事如瓊者瓊本海中一大洲去畿輔絕遠自孝陵稱為南溟奇甸未百年而人賢奮起肩背

相望環五指之山三千餘里

千駟本作十

遂為名臣淵藪雖孝

陵煌煌天語為之開厥禎祥然亦宋末忠臣義士之氣鬱勃而成天不得忠臣義士之子孫而報之而報之於其地之人賢天之所以厚愛夫忠臣義士也如此兩先生之事與二謝冉黃四君者後先一揆異時瓊之生才其光明俊偉以經世之文而為名世之業如文莊其人者當五里而一人焉十里而一人焉不但吳氏王氏之子孫簪纓蟬聯獨受其報而已也則兩先生在天之精爽其亦以少慰也夫



封川死事傳

封川死事曰何兆寧

何兆寧字仲軾香山人崇禎間以諸生請從禁旅征賊河

內有戰功總兵王樸甚奇之題授守備會兩廣用兵兆寧

以部咨歸赴軍門請勦盤古十八峒賊古鄔本作力又鄔案廣州府志作石

破之尋與惠州參將施王政破沙子下岡諸賊復合楚師

擣之於主簿峒殲其渠首陞游擊未幾復從總督沈猶龍

征九連山八排諸尚悉平之陞參將統轄肇標水師援勦

海上諸寇兆寧善用間謀往往預得其聲息賊夕聚謀而

兆寧樓船朝至矣隆武初靖江王擁兵東下人情疑懼諸

將咸持兩端總督丁魁楚召兆寧與謀兆寧悉藏其哨艦

港中而以漁艇數十溯流火攻破之陞思恩副將旋陞正  
總兵永曆元年夏從慶國公陳邦傳戰敵於潯梧容縣北  
流凡三恢復其地長驅至封川江口其監軍副使易第昌  
被箭入貴縣山中全髮而死兆寧拒守封川旬日戰不利  
身負數創躍入江中以死詔贈封川伯廕子昭錦衣衛僉  
事

武岡死事傳

武岡死事曰劉承胤

劉承胤字思山一字定一江寧人年二十以勇略為南兵部尚書黃克纘所器重題授湖廣征勦營游擊崇禎間奉命征勦有功於蕪黃麻城承天襄陽等處每行兵手持鐵棍重六十四斤先聲所至萬人辟易軍中號曰鐵棍將軍湖撫余攀桂題陞副將管撫標中營事轉貴州副將苗夷作亂承胤率兵攻克萬山雙溝八排

八排本  
作八

兩江爛泥橫

嶺諸崗苗夷平陞黎平總兵廕襲錦衣衛百戶崇禎十五年武岡州東鄉黃橋有逆民袁有志等構黨數萬陷武岡及澧州常德弑岷王焚燬宮殿僭稱王號置偽官知州譚

岷雪告急承胤率兵進勦脫王世子於難得王冊寶賊巢

盡下楚黔兩撫疏以聞詔封征蠻伯明季南略卷十三作丙戌七月隆武封為

定蠻伯世券命世鎮武岡流賊破寶慶統兵復之殲賊斬偽

官弘光元年河南北盡失承胤欲統兵下南京護衛馬士

英疏止之晉封侯爵行在陽秋作隆武二年十月永明王進承胤武定侯鎮寶慶其後

南都福州連陷諸路文武臣僚赴武岡欲立岷王監國承

胤曰岷王我塔也若議監國是使天下後世笑我欲以女

為皇后也乃致書廣西巡撫瞿式耜議立永明王王既監

國旋即真乃封承胤安國公南略作丁亥五月進封興國公承胤請幸武

岡詔從之永曆元年丁亥八月敵恭順王孔有德懷順王

耿仲明智順王尚可喜噶喇額真焦奈藍拜率兵犯湖南



初渡岳州督師何騰蛟率諸鎮將棄長沙走桂林曹志建  
棄永州走鎮峽敵至湘潭取仲明別率兵趨湖西尚可喜  
東渡江攻燕子窩我總兵陳士明等率眾降長沙府屬各  
縣悉陷敵入衡州我總兵郝永忠攻桂陽不克總兵張學  
禮被擒永忠棄營走道州敵追之復走粵西孔有德耿仲  
明同各固山兵絲竇慶攻武岡至紫陽河與我總兵陳友  
隆等戰未決鄔本作陳文隆  
南略作陳友龍可喜自道州會之遂克武岡  
武岡被圍時承胤出城迎戰不利遣總兵梁應忠率兵護  
上出幸廣西承胤乃偽降以緩追騎事覺被拷掠不屈死  
之祖母李氏年八十先投水死子起鵬年八歲為有德所  
殺



永昌死事傳

永昌死事曰王運開曰劉廷標

王運開字子朗夾江人劉廷標字霞起

鄒案上杭縣志作字玉存上杭

人弘光元年乙酉土司沙定洲叛

定明季南略卷十二作亭

攻陷雲南

黔國公沐天波脫走永昌旣而賊孫可望等至攻破定洲

定洲遁歸阿迷可望等遂屠臨安曲靖兩府

明紀作曲靖交水

乘

勢下楚雄大理移檄永昌是時運開以永昌推官署金騰

道印而廷標以通判署府印謀守瀾滄江拒賊會可望歸

正或勸天波往從之天波以問兩人皆曰賊喪敗之餘遊

魂倏忽誠恐不為天下所容故設此名號以欺人公今大

節一屈不可復申吾兩人受命守土自分死亡久矣豈能

纍然降賊天波無以應然郡人大恐競叩署譁哭請降雨  
人知事不可為因遣家人西走騰越運開謂其弟運閔曰  
弟未仕義可無死其將吾累原注云一作妾俱西遂偕走廷標出  
坐廳事諭眾曰逆賊狡詐吾素知之他城之降而屠者亦  
屢屢矣處亂世死生有數若輩何畏之深耶眾大譁或直  
前曰世間無不畏死者廷標笑曰莫謂無人因取酒置鴛  
其中將飲眾惶懼趨出是夕運開再過廷標飲極歡既罷  
運開遂縊廷標聞之沐浴焚香撰上烈皇帝遺表賦詩二  
章二明史本傳作三書畢以練懸樑練絕復甦客持之曰此天留  
公也廷標厲辭拒之盥漱整衣冠更帛乃絕永曆元年丁  
亥某月某日也運閔聞訃偕廷標子弟馳至治喪有過哭

者曰此吾輩布帛菽粟事耳其後可望至永昌襲執天波  
父子聞二人死嘆異之命求其後將授官使人邀運閔運  
閔欣然就道至潞江中流出一行書與其僕曰吾兄弟豈  
可作兩途人耶遂躍入江中既沉復出眾爭救之運閔揮  
手竟沉死僕視其書云將吾骨與兄合葬曰夾江二王兄  
弟之墓運閔字子遠永昌陷時聞有馬生吳者  
吳鄒本  
作員  
閔  
門自焚亦奇烈士云



無錫死節傳

此傳據史  
研本補

無錫死節華允誠

華允誠字汝立無錫人天啓二年進士歸而受學鄉先達

高攀龍之門踰一年

明史本傳作四年春  
明季南略卷九同此

從攀龍北上授

工部都水司主事是時魏忠賢與閣臣魏廣微等亂政方

欲盡誅逐東林黨人凡士大夫為世指名者悉墮黨中允

誠將草疏以爭攀龍力止之會楊璉以疏劾忠賢得罪攀

龍與諸賢相次去位允誠遂告以歸赴補營繕司監督疏

瑤廠減經費銀數萬兩以繕城工南御史疏薦天下清官

四人首列允誠眾以為當久之

明史本傳作  
崇禎二年冬

擢兵部職方

司員外郎協贊郎中事於是溫體仁在內閣閔洪學在吏

部兩人相表裏謀翻故時所定逆案一切是非進退不廢  
眾望允誠憤然曰去河北賊易去朝中朋黨難吾非以養  
母引退即當死職官下耳允誠先上母老乞休疏不許遂  
卽陳三大可惜四大可憂數千言其末謂次輔與冢臣以  
同邑為朋比吏部惟阿閣臣之意造門請命昏夜為常加  
膝墜淵惟其所欲甚至庇同鄉則逆黨可因事保舉排正  
類則講官可借題逼逐皇上惡諸臣之欺欺莫大於此惡  
諸臣之專專莫甚於此厭諸臣之黨黨莫固於此威福下  
移而舉措倒置臣寒心竊戚疏上凡再奉旨詰責允誠遂  
發洪學冒功冒廢諸弊言益侃侃不阿且謂喪師辱國之  
王化貞何以不正法也潔己愛民之徐大成

徐明史本傳  
及南略均作



余何以不矜恤也唐世濟之黨護逃臣何以驗得美官也  
劉宗周之孤忠自立何以不登啓事也特體仁方擅寵中  
朝見允誠疏者悉為危之允誠亦分禍及然上意頗悟僅  
奪俸半年是後釋大成誅化貞而逐洪學最後世濟下獄  
體仁亦竟罷去訖如允誠言其年竟以養終告歸歸十二  
年而思宗卽位於南京始調吏部文選司員外郎尋改驗  
封到署甫十有三日復疾歸凡通籍二十餘年立朝不滿  
五載其剛方蓋天性也中間疏爭者率國家大計而訖未  
究其用知允誠者惜之自諸生時讀攀龍心性靜坐諸說  
卽深信不疑及從之遊造詣益深邃攀龍旣沒允誠發明  
高氏之學巍然稱東南大儒蓋攀龍之後一人而已戊子

避地鄒氏鎮標兵猝至允誠以不薙髮被執送抵南京諸  
滿漢咸集皆以緩言歎允誠允誠植立南向舉手曰二祖  
列宗神靈在上允誠髮不可去身不可降乃遇害年六十  
有一是日天大雷電晦冥風雨驟至父老見者相語曰此  
不要錢華吏部也無不嘆息泣下從孫尚濂從之死僕薛  
成聞允誠執長號不食先一日死僕朱孝聞訃亦號哭立  
死閱十年縣人作神主祔東林道南祠學者因允誠自號  
尊之曰鳳超先生

屈大均曰汪琬曰予聞鼎革之際公間指頭上髮嘆曰留  
此必買禍然吾食祿於朝去之無以見故主地下此其定  
志久矣嗟乎忠憲公授命於前公又仗節於後所遭之變

雖殊而就義則一也不負所學誠哉是師是弟子云